

فيلم

العشاء الأخير

قصة وسيناريو وحوار
فيليب فكري

Avant Titre

قبل التيترات

مشهد 1

نهار / خارجي

سجن وادي النطرون

- لقطات بانورامية من أعلى تستعرض مبنى السجن ثم الأسوار المرتفعة، مع استعراض لرهبة المكان.. ثم داخل السجن من أعلى الأسوار لعرض فناء السجن من الداخل.. يصاحب المشهد صوت العميد/ رفعت الكومي، وهو يقرأ حكم الإعدام على شخص ما، استعدادًا لتنفيذه.
- يظهر الصوت خافتًا ويعلوا كلما دلفنا داخل السجن، ويبدو الصوت من بعيد الى أن نقترّب.
- صوت العميد رفعت يبدو واثقًا، جريئًا، عاليًا، وكأنه غير مبالي برهبة الحدث من كثرة اعتياده، وأيضًا ينم عن خشونته التي ستظهر بوضوح فيما بعد.

ص. رفعت

بسم الله الرحمن الرحيم.. قضت محكمة جنايات القاهرة حضوريًا.. بإجماع الآراء.. في القضية رقم 987 لسنة 2019، جنايات القاهرة.. بمعاقبة المتهم سيد مصطفى النوبي بالإعدام شنقًا، حيث أنه بتاريخ 12 يوليو 2019 بدائرة قسم باب اللوق – محافظة القاهرة.. قام المتهم بقتل المجني عليه هشام يونس الراوي، بأن عقد العزم على التخلص منه بعد أن تربص له داخل منزله بغرض قتله، عن طريق سبق الإصرار والترصد، باستخدام سلاح أبيض (مطواه قرن غزال) كان قد أعده مسبقًا لهذا الغرض، بأن قام المتهم بطعن المجني عليه 12 طعنة نافذة، قاصدًا قتله، وفقًا لما جاء بالمادة التشريحية للجثمان...

مزج

مبنى سجن وادي النطرون

(غرفة الإعدام)

- تمزج اللقطة الأولى للسجن مع اللقطة الداخلية لغرفة الإعدام، مع استمرار لصوت العميد/ رفعت.. الذي يبدو عاليًا عن المشهد السابق.. تستعرض الكاميرا غرفة الإعدام بالتركيز على الأرضية مع أرجل المتهم (المربوطة) التي تشير أنه شاب.. وأرجل الضباط وعددهم 4 مع شخص يرتدي بدلة (وكيل نيابة) مع شيخ، وعشماوي الذي يقوم بالتنفيذ، ثم ذراع تنفيذ الحكم، الى أن يظهر العميد رفعت، وهو يقرأ نص الحكم.

- العميد **رفعت الكومي** رجل خمسيني يرتدي الزي العسكري، تبدو عليه القوة البدنية والشخصية، له شارب يؤكد صرامته، مع ملامح حادة، مستهينة.. مع صوت قوى، حاد، عنيف إلى حد ما.. مع عدم ضرورة التركيز على ملامح باقي الأشخاص الموجودين بما فيهم المتهم..

رفعت

... وقد قضت محكمة النقض بإقرار الحكم السابق بإعدام
المتهم سيد مصطفى النوبي شنقًا، وقد صدق السيد رئيس
الجمهورية على حكم الإعدام، كما قام فضيلة المفتي
بالتصديق على حكم الإعدام... كما قام السيد اللواء مساعد
وزير الداخلية لقطاع مصلحة السجون، بتحديد اليوم 13
أكتوبر 2022 موعداً للتنفيذ....

- يستمر صوت العميد رفعت مع لقطات تؤكد رهبة الحدث.. ثم تثبت اللقطة على حبل المشنقة مع انتهاء كلام العميد رفعت.. صوت ذراع حبل المشنقة.. مع قطع مفاجئ.

قطع

حجرة فوق سطح

- صوت اقترحام عالي وعنيف يقطع المشهد السابق، ليظهر قوة من الشرطة تقتحم غرفة صغيرة فوق سطح بيت قديم، يبدو من الغرفة أنها (مرسم) لما بها من لوحات مرسومة وأدوات رسم (ألوان زيتية، وشاسيهاة للرسم فارغة) ويتم البحث داخل الغرفة ليظهر (شريف البنهاوي) جالس القرفصاء في أحد أركان الغرفة، صامتاً، وكأنه غير مبالي ومنتظر، ويتم القبض عليه، دون أن يُبدي أي مقاومة، ويستسلم صامتاً، بوجه خالي من أي تعبير يظهر استياء أو خضة، وكأنه كان متوقعاً بل ومنتظراً ذلك الاقترحام، ويخرج معهم في هدوء شديد..

- شريف شاب عشريني.. وسيم.. نحيف الجسم.. ملامحه بريئة وهادئة وتنم عن ذكاء وإبداع.. هيئته لا تمت بأي صلة للمجرمين والمسجلين.. وتعبيرات وجهه ثابتة ولا يبدو عليه أي انطباع واضح، سوى الصمت.

قطع

التيترات (فوتومونتاج)

تنزل التيترات مع فوتومونتاج يستعرض تداخل بين لقطات القبض على شريف البنهاوي وركوبه البوكس والتحقيق معه ومن ثم ترحيله الى السجن بركوبه سيارة الترحيلات ودخوله السجن واستلامه للملابس البيضاء، وكافة التفاصيل التي تتم في تلك الحالة (كمتهم تحت الحبس الاحتياطي).. كل هذا مع تداخل ومزج مع لقطات لفنانين زمن الفن الجميل مثل إسماعيل يس، ويوسف وهبي وأم كلثوم واسمهان،... مع فنانين أجانب مع لوحات عالمية لأشهر فنانين العالم مثل مايكل أنجلو وريمبرانت وليوناردو دافنشي، مع التركيز الأكثر والأوضح على لوحة (العشاء الأخير) لدافنشي.

(يمكن سماع مقدمة أغنية الفن "ياللي بدعتوا الفنون"، بصوت محمد عبد الوهاب، مع التيترات، وتستمر معنا في خلفية المشهد القادم).

قطع

مكتب العميد رفعت

(مبنى السجن)

- يجلس رفعت إلى مكتبه متحدثًا في الموبايل وهو يستمتع بتدخين سيجارته.. يقلب بين يديه بشغف (نوتة) تبدو أنها قديمة جدًا وطرازها من القرن الماضي.. يجلس أمامه العقيد إبراهيم السويقي (أربعيني) يدخل هو الآخر ويمسك في يده ملف به أوراق، وهو يوقع أو يؤشر عليها، و2 ضباط آخران واقفان عند باب المكتب يتحدثان.

- يتم استعراض للمكتب بما فيه أجواء الدخان المنتشر، والاسم الموجود على لافتة المكتب:

(العميد رفعت الكومي نائب مأمور سجن وادي النطرون).

- الباب مفتوح وتبدو خارجه حركة طبيعية..

- صوت أغنية (ياللي بدعتوا الفنون) في الخلفية..

- تبدو السعادة على وجه رفعت وهو يتحدث في التليفون وينظر للنوتة التي في يده بشغف وهو يدقق النظر فيها عن قرب، يتكلم وصوته يفيض بالفرح..

رفعت

جيبته ازاى دي يابن اللذينا.. دي كنز

- لحظات صمت وهو يستمع للمتصل، مع دوشة لحديث الضباط الواقفين وأجواء المكتب.. رفعت يبدو عليه الفرحة والانبهار..

رفعت

أيوه.. بس يوسف وهبي مرة واحدة.. أوعى يا مؤنس تكون
بتلعب معايا.. انت عارفني.. عارف طبعًا لو ملعوب ممكن
أعمل فيك أيه...

- يتحسس ملمس الورق بهيام ويدقق النظر في النوتة وهو مقترب منها وينفعل بفرح

رفعت

يخرب عقلك.. ده ماضي كمان.. أه والله امضته أهى..

- يقلب في أوراق النوتة ويتوقف فجأة.. علامات الانبهار تملو وجهه

رفعت

استنى استنى.. ده هنا وهو بيحكى عن لما خد البهوية..
يخربيت سنينك..

- يرن جرس التليفون الأرضي وينظر رفعت باهتمام للرقم الداخلي الذي يظهر ليتأكد أن المتصل أحد القادة.. فينهي المكالمة مع مؤنس سرعًا..

رفعت

طب أقفل دلوقتي هكلمك تاني

- يمسك سماعة التليفون الأرضي ويرد بجدية واهتمام..

رفعت

ألو.. معاك..... أيوة يا فندم.. لأ سيادتك اتطمئن.. التنفيذ
والكشف وتسليم الجثة كله تم بهدوء زي ما سعادتك أمرت
وكأنك موجود بالظبط.. تمام يا افندم.. حاضر.. مع السلامة...

- يمسك رفعت بالنوتة مرة أخرى بنفس الشغف وتبدو عليه السعادة، ويقلب بها وهو يردد بأداء
تقليدي ليوسف وهبي..

رفعت

ياللهول

- ويضحك وكأنه منتصرًا.. ثم ينظر إليه ابراهيم ووجهه به فضول لمعرفة سر سعادة رفعت..

ابراهيم:

واضح ان المرادي فيها جون يا باشا..

- يرد رفعت بشموخ وانتصار وفرح..

رفعت

كنز يا هيماء.. مذكرات يوسف بيه وهبي

ابراهيم

ياه.. معقولة.. الأصلية؟

رفعت

- بثقة وافتخار..

طبعا.. انا بقى عندي خبرة من كتر اللي شوفته ولا مدير
إدارة مكافحة التزييف والتزوير.. بص أهى.. الورق باين أنه
من أكثر من 70 سنة.. ده فيه صفحات دايرة..

إبراهيم

ياه.. دي قديمة قوي.. أكيد فيها دُرر..

- رفعت يشاور لإبراهيم بالتصديق على كلامه وهو يرن على جرس الساعي

رفعت

هاتلي قهوتي يابني، ولا أقولك هاتلي شاي بلبن..

- رفعت موجهًا كلامه لإبراهيم..

رفعت

بقولك كنز يابني.. كنز

إبراهيم

طب اسمحلي يا باشا.. متأخذنيش يعني

- يقاطعه رفعت وكأنه يعرف ماذا سيقول..

رفعت

مش هقولك هدفع فيها كام.. ومش هقولك برضو أنا ليه بحب
الحاجات القديمة والانتيكات دي.. وبرضو مش هقولك أنا ليه
بضيع فلوسي على الكلام ده..

- ملامح وجه إبراهيم تدل على استغرابه ودهشته..

إبراهيم

طب ليه بس يا باشا.. أنا بس مستغرب.. يعني اشمعني...

- رفعت مقاطعًا..

رفعت

ماهو عشان مستغرب.. مش هقولك.. دي حاجات ميقدرهاش
غير الفنانين أو اللي بيعرفوا يتذوقوا الفن، وانت لامواخذه
يعني.. كُفتجي

- يضحك بعشم وبيبتسم له إبراهيم على الدعابة، ويدخل الساعي بكوب شاي بلبن ويضعه أمام
العميد رفعت..

إبراهيم

ماشى يا باشا.. مقبولة..

ماهو مفيش حاجة تنافس حبك للانتيكات دي قد حبك للشاي
بلبن.. أنا فاكر أنا آخر مرة شربته من ييجي 15 سنة..

رفعت

ما هو الشاي بلبن ده بقى يا هيمة زيه زي الانتيكات كده..
حاجة ريحتها قديمة بتفكرني بأيام المدرسة

إبراهيم

بس ان جيت للحق بقى.. أنا خلاص خدت على سيادتك يعني
ف موضوع حبك للمقتنيات القديمة دي.. بس اللي انا

مستغربله بحق ربنا بجد.. ازاي عارف تضحك ومستجمع
نفسك كدة ولا كاتك لسنة منفذ حكم إعدام من ساعتين، لأ وفي
عيل كمان مكمش 25 سنة..

- يظهر على رفعت الضيق ويجاوب مسرعاً بحدة، وهو يرتشف من الشاي بلبن ويدخن
سيجارتته، وينظر في الأوراق التي أمامه..

رفعت

وأنا مالي

إبراهيم

مالك ازاي يا باشا.. أنا قصدي يعني المشاعر أيه.. ده الواد
شباب صغير....

- يرد رفعت بعصبية واضحة..

رفعت

أيوه المفروض أعمل أيه يعني؟.. شاب ولا شايب ولا زفت،
ما يغور ف ستين داهية تأخده.. أنا بنفذ الأوامر في مذنب
مجرم.. تتأثر بقا ومشاعرك تتحرك ولا مؤاخذه لو عندك شك
ولو واحد ف المية ان الواد ده بريء.. غير كده عيل شمال
وعمل جريمة واتحكم عليه بالقانون والشريعة، وأنا دوري
أنفذ.. بس كدة..

إبراهيم

تمام يا باشا.. ربنا يدينا صلابة قلبك دي.. بصراحة انا مش
عارف أألم على نفسي من ساعتها...

- يعود رفعت لهدوئه

رفعت

يا هيمة عيب عليك.. دانت عقيد وشوفت الموضوع ده كثير..
اشمعى يعني المرادي؟.. أيه الجديد؟.. انت بس اللي رهيف..
مش بقولك كفتجي

- رفعت يضحك، وإبراهيم يبتسم..

إبراهيم

مش عارف يا باشا.. يمكن عشان الواد صغير.. أو عشان من
دور أيمن ابني.. حاجة زي كدة...

- رفعت وكأنه يريد تغيير الموضوع.. يتحدث بجدية..

رفعت

طب روح شوفلنا التمام يا حضرة الطابط.. مش هنقضيها
رغي...

إبراهيم

تمام.. سعادتك..

- يقوم إبراهيم محرّجًا..

- رفعت يمسك مذكرات يوسف وهبي من جديد.. ويقلب فيها.. مستمتعًا، ومزهوةً..

قطع

زنزانة

- زنزانة مظلمة، تعبرها إضاءة خفيفة من الشباك فقط.. يجلس حوالي 6 سجناء.. بينهم شريف الذي يبدو من ملابسه البيضاء أنه لازال في الحبس الاحتياطي.. شريف جالس منزوي يمسك بيده طوبة صغيرة ويبدو من اللقطة أنه يشخبط على الأرض، ويظهر من الشخبطة شكل كروكي لملاك بجناحين مفرودين.. ويظل صامتًا ولا يعبر أي اهتمام للآخرين ولا يرد على أحد...
- اثنين من السجناء يلعبان شطرنج على الأرض.. وآخر يقوم بتحضير الشاي ويوجه كلامه لشريف..

سجين 1

تشرب شاي يا مستجد؟..

- شريف ينظر له ولا يرد.. نظرات شريف تتسم دائما بالبراءة، واللامبالاه..

سجين 1

برضو مش ناوي تنطق؟

يا بني ما هو هنا فيه نظام.. مش زي برة.. وفيه مشاركة
كمان.. يعني كل واحد هنا ليه دور.. بيعمل حاجة ويجيب
حاجة.. يعني شغل تيم وورك، مش وان مان شو..

- سجين 1 يوجه حديثه للسجين الذي يلعب شطرنج (سيد) بطريقة..

سجين 1

ماتفهمه النظام يا ابو السيد.. ده لو فضل كدة هيشلنا واحنا
مش ناقصين.. لأ وشكله مطول.. ده جاي ف جريمة قتل..
مش كيوت زيك جاي ف قتل خطأ..

- سيد بابتسامة وفخر مقتعل

سيد

تمام يا كبير.. ماتقلقش.. هظبطهولك.. ياخذ يومين الصدمة
وهيبقى بارالانت بعد كدة.. ده شغلي بقي..

سجين 1

ماشي يا عم الدكتور..

- يوجه حديثه لشريف..

سجين 1

ماهو سيد هو الأخصائي النفسي للزنزانة.. أو تقدر تقول
الصدر الحنين..

- بضحك..

يابني ما تنطق بقي.. انت هتقضيها أخرس.. ده لسة بدري

سيد

ما تستعجلش عليه يا كبير.. كله ف الأول كدة.. أخلص الدور
ده وابتدي الكشف..

- سجين 1 بطيبة وأداء العالم ببواطن الأمور

سجين 1

بس براحة عليه يا سيد.. الواد ده شكله وراه حكاية، مش
عيل هيتيا..

- ثم يقترب من الشخبطة ع الأرض ليلاحظ رسمة الملاك الكروكي، ويكمل حديثه لـ سيد..

سجين 1

الحق يا سيد.. ده الواد ده رسيم.. ده راسم عصفورة، ولا ايه
ده؟.. ده باينه ملاك يا سيد..

- سيد وهو مستمر ف اللعب..

سيد

مين اللي ملاك.. الواد ولا الرسمة؟.. وبعدين هو فيه ملايكة
بتعتب السجن برضو؟..

- سجين 2 الذي يلعب الشطرنج مع سيد..

سجين 2

وهو فيه ملايكة بتنزل ع الأرض أصلا.. كش ملك يا عمنا..

سيد

أه يا بن المتضايقة..

- يتم التركيز على ملامح شريف البريئة والسرحان في القادم، والصمت دون تعبير..

قطع

حجرة نوم شقة رفعت + الشارع (سيارة رفعت)

(مكالمة تليفون)

- تجلس (سلوى) زوجة العميد رفعت على السرير في غرفة النوم وهي ممسكة بمبرد الأظافر لتقلم أظافرها.
- تتحدث في الموبايل عن طريق سماعة (أي بود)، مع زوجها العميد رفعت، الذي يحدثها من سيارته في وقت غروب ينم عن وقت عودته من عمله.
- سلوى امرأة أربعينية.. جميلة إلى حد ما.. ترتدي قميص بيتي، يبدو عليها الأناقة، في اللمسات الأخيرة من وضع الماكياج مع تطبيق الشعر.. تجهز نفسها للخروج.
- أثاث الغرفة يبدو منه الشياكة في حدود الأعلى من المتوسط.. مهندمة ومنظمة وألوانها متناسقة.
- المشاهد متبادلة أثناء الحديث ف الموبايل بين سلوى في غرفة نومها، ورفعت في سيارته الخاصة التي يقودها في شوارع المدينة، ويرتدي سماعة موبايل للحديث.

سلوى

خلاص أهو. انا تقريباً جاهزة.. على ما توصل هتلاقيني
قدامك..

- قطع على رفعت.. رفعت بلهفة وشغف..

رفعت

طب انجزي يا سلوى.. احنا متأخرين أصلاً.. والفيلم ده بقالي
سنين هتجنن عليه.. كنت قالب عليه الدنيا..

- قطع على سلوى..

سلوى

بجد؟.. طب ربنا يستر.. انت مقولتليش أصلاً ده فيلم أيه وبتاع
مين...

- قطع على رفعت..

رفعت

مانا عاملها لك مفاجأة.. بس ماشي هقولك.. أصل ده فيلم جديد
نوفي، ومنزلش ف ولا حتة ف العالم غير فرنسا، والنهاردة
أول عرض ليه في مصر..

- قطع على سلوى.. سلوى مندهشة..

سلوى

فرنسا، وأول يوم في مصر؟.. يعني فيلم فرنساوي.. أو
مغربي؟.. صح؟.. على الله بس يكون مترجم ولا مدبلج بدل
ما نقعد محتاسين..

- قطع على رفعت.. رفعت مبتسمًا..

رفعت

لا يا ستي.. ده فيلم عربي ومصري كمان..

- قطع على سلوى.. سلوى تجهز ملابس الخروج وتستعد لارتداءها..

سلوى

طب انجز بقا وقوللي بتاع مين عشان ألحق أكمل لبس.. بدل
ما أأخرك واسمعلي كلمتين منك..

- قطع على رفعت.. رفعت بفخر وفرحة..

رفعت

خلاص هقولك يا ستي.. ده فيلم جديد لاسماعيل ياسين

- قطع على سلوى.. تتلقاها سلوى بصدمة كوميدية..

سلوى

يا نهار اسود ومنيل.. أكثر من 25 سنة جواز ولحد دلوقتي
مش عارفة استوعبك..

- قطع على رفعت.. رفعت يضحك وملاحه تتم عن موافقته لكلام سلوى..

رفعت

حد قالك تتجوزي ظابط مجنون بالفن.. وبعدين فين
المشكلة؟..

- قطع على سلوى.. سلوى بعصبية كوميدية..

سلوى

فين مشكلة أيه.. أفهمها ازاي دي.. فيلم جديد لاسماعيل
ياسين ازاي يعني؟..

- قطع على رفعت..

رفعت

انتي عارفة إسماعيل ياسين عمل كام فيلم؟.. ولا فاكرة ان
أفلام إسماعيل ياسين اللي بنشوفها دي كل اللي عمله؟.. ده
ليه أفلام في فرنسا محدش يعرف عنها حاجة أصلا.. وده بقا
واحد منهم.

- قطع على سلوى.. سلوى بياس..

سلوى

أوبا.. يعني ناوي تودينا نتفرج في القصور والمراكز الثقافية
بتاعتك دي.. وانا اللي كنت فاكرك هنروح السينما بقى وكدة..

- قطع على رفعت.. رفعت بضحك وكأنه بيهدد..

رفعت

وحياتك عندي هتتبسطي.. انجزي بس عشان لو وصلت
وملقتكيش واقفة هسيبك وامشي..

- قطع على سلوى..

سلوى

ما تمشي يا خويا.. هجيب أي قناة من بتوع زمن الفن الجميل
واتفرج على أي فيلم لاسماعيل ياسين.. وبعدين انت اللي
بتأخرنى أهو.. يللا باي..

- قطع على رفعت..

رفعت

هرن عليكى أول ما أوصل.. سلام

قطع

فناء السجن

- يجلس شريف منزوياً على الأرض، بينما السجناء يتمشون وبعضهم يتكلمون، وهناك حركة واضحة، والعساكر في أماكنها للحراسة
- يظهر سيد حاملاً كوبين شاي ويقترّب من شريف ويجلس بجواره، ويوجه حديثه له..

سيد

عرفت أنك خريج صيدلة.. pharmacist

- ينظر له شريف باستغراب..

سيد

متستغريش.. ماهو محسوبك دكتور برضو.. بس
Anesthesiologist دكتور تخدير.. عملية .. غلّطت..
المريض مات.. 3 سنين.. شوفت سهلة ازاي..

- شريف صامت..

- يتحدث سيد بأداء الحكيم..

سيد

بص يا شريف يا مستجد.. خد الكلمتين دول، وفكر فيهم
كويس..

حاجتين مفيش أهم منهم في السجن.. لسانك وذاكرتك.. لو
واحدة فيهم قلشت، هتموت..

لسانك هو اللي بيعديك اليوم اللي بتقضيه هنا..

أما الذاكرة بقا ال Memory .. هي الحياة اللي بتعيشها.. يا
أما تفكر اللي حصل وتسترجعه وتعيش فيه.. يا إما تفكر ف
اللي كان نفسك يحصل وتتخيله وتعيش فيه.. غير كدة انت
ميت...

انت تهتمك يا اعدام يا تأبيدة.. ف الحالتين هتعيش لحد ما
يقرروا هيعملوا فيك أيه... بلاش تحكم على نفسك بالإعدام
بدري عن ميعاد يا دكتور..

- شريف وكأنه غير مبالي ويشخبط بأصبعه على تراب الأرض...

- يبادر سيد بالوقوف وترك شريف، وكأنه تذكر شيء..

سيد

أه . صحيح.. نسيت أقولك على أهم حاجة..

التحميل على واحدة بس م الحاجتين دول، بيضعفها، زي اللي
بيزك برجل واحدة كدة.. وساعتها الوجع بيبقى أضعاف..
سلام يا دكترة..

- شريف مستمر في الشخبطة وهو سرحان..

قطع

(سيارة رفعت)

- ## سلوی

هو انت مشبعش من سُمعة.. جاييهولنا هنا كمان؟..

رفعت

بزمِ تڪ، متبسط تيش؟

سنوی

اتبسطت.. وضحت کمان، بس نفسی اخر رر رر رر ج..

رفعت

أمال احنا بنعمل أيه دلوقتي..

سنوی

حببيي.. أنا مقدرة حبك وشغفك ده للفن بكل أنواعه.. بس أنا ذنبي أياه أنك ضليت طريقك وطلعت ظابط.. انت يا طول النهار في شغلك، يا إما لو خرجنا بتوديني ندوات مع ناس مثقفين ومقربين كدة.. عاوزة أنطلق.. انا بكبر يا رفعت.. وقاعدة لوحدي طول اليوم.. عاوزة أشم هوا يا أخی..

رفعت

حاضر.. شوفي عاوزه أيه وانا هظبط أموري ف القطاع..

سنووی

بجد؟.. طب تعالى نروح الساحل يومين نغير جو.. وبالمرة
ناخد معانا سارة..

- يظهر على رفعت علامات الضيق المفاجئ فور سماعه لاسم سارة..

رفعت

یوووہ..

سلوى

انا مش فاهمة ليه بتعمل كدة كل ما تيجي سيرتها.. دي بنت
أخوك برضو..

- رفعت بانفعال وغضب..

رفعت:

بنت اخويا أه.. بس مبتحبنيش.. بتكرهني.. بدل ما تتعامل
معايأ كأني مكان ابوها اللي مات، بتبعد وبقت تكلمك وتقابلك
من ورايا.. وبقت كل ما تشوفني تقلب وشها ولا كأنها شافت
عفريت..

- سلوى (بضحك)

سلوى:

ماهو انت هيبه برضو يا سيادة نائب الأمور.. دانا نفسي
بخاف منك..

- رفعت متوعدًا (هذار)..

رفعت

بقا كدة.. طب مفيش ساحل..

- سلوى تضع يدها على فمها (بهذار)..

سلوى

لأ.. خلاص.. سكت أهو..

قطع

منزل شريف

(حجرة نوم أم شريف)

- أم شريف البنهاوي، سيدة ستينية، تجلس في غرفتها المتواضعة على السرير..
- الأجواء مظلمة وحزينة وكأنه ميتم.. ممسكة بصورة شريف ابنها، وهي تبكي.. ترتدي ملابس بيتية بسيطة وكثيبة أيضاً.. على الكوميدينو صينية صغيرة عليها أكل متواضع، ولم يمس.
- لحظات حزينة تمر على أم شريف، وكأنها تسترجع ذكرياتها مع ابنها.
- تدخل نادية، فتاة في نهاية العشرينات.. تكبر شريف بسنوات قليلة.. ترتدي ملابس حزينة وغامقة ووجها عابس بلا ميكاب.. تنتظر على صينية الأكل...

نادية

كدة برضو يا ماما.. ولا لقمة.. دانا دعيت على نفسي..

أم شريف

بعد الشر عليك يا حبيبتي..

- تجلس نادية على السرير بجوار والدتها

نادية

طب أبوس إيدك، انا مش مستحمة، لو حصلك حاجة دلوقتي
أعمل أيه..

أم شريف

ما تقلقش يا نادية.. انا كويسة..

نادية

طب كلي عشان خاطري، عشان تاخدي الدوا..

أم شريف

دوا؟..

- تبكي بحرقة وكأنها تذكرت...

أم شريف

وانا كنت أعرف دوا من التاني، ماهو حبيبي اللي كان بيدني
الأدوية وحقنة الأسولين..

- تبكي بكاء نحيب..

أم شريف

أخرتها يتهموه في قضية قتل.. ده يرضي حد يا رب.. بقى
شريف اللي كل الناس بتشهدله.. اللي شايطني انا وانتى على
راسه.. يقتل؟.. يرضي مين الظلم ده يا رب..

نادية

متقلقيش يا ماما.. أكيد ربنا مش هيسيبه.. واحنا متابعين مع
المحامى وبصراحة عماد مش ساكت..

أم شريف

كتر خير ده يا بنتي، ما هم روحهم ف بعض وزى الاخوات..

- نادية تبكي ويرن جرس الباب..

أم شريف

روحي شوفي مين يا بنتي..

- تمسح نادية دموعها، وتهم لوضع الطرحة على رأسها..

نادية

ده هو يا ماما.. عماد.. هو كلمني وقال انه جاي عشان
يتظمن عليكى ونشوف هنعمل أليه

- تقوم نادية لفتح الباب

قطع

منزل شريف

(الصالة)

- يبدو البيت عادي.. متوسط .. تفتح نادبة باب المنزل..
- يدخل عماد حاملا شنط وأكياس بها أدوية ومستلزمات غذائية للبيت..
- عماد شاب عشريني ن عمر شريف..

نادبة

تعالى يا عماد.. اتفضل

عماد

لا يا نادبة . معلى.. انا همشى علطول.. قولى أشوفكوا لو محتاجين حاجة بس.. دي أدوية طنط، ودي شوية حاجات للبيت..

- تقوم أم شريف من حجرتها لاستقبال عماد

أم شريف

ليه يا بني كدة..

عماد:

من بعض خيرك يا ماما.. همشى انا بقى عشان لسة ورايا حاجات كتير..

أم شريف

طب قولنا يابني وصلت لأيه..

عماد

خير يا ماما انشاءالله.. النهاردة روت مع المحامي وخذنا صورة من المحضر وهو هياخد إذن بالزيارة ويبلغنا.. هقولك طبعا قبلها عشان تجهزي نفسك..

أم شريف

لأ.. ماتقوليش.. مقدرش.. لو روت هترجعوا من غيري.. اموت ولا اشوفه في الحالة دي.. وهو كمان هيتعذب اكتر لما يشوفني.. انا عارفه..

- تبكي بحرقة وتدخل غرفتها.. ينظران عماد ونادبة لبعض بحزن..

- نادية بصوت منخفض الى حد ما.. موجهة حديثها لـ عماد..

نادية

بقولك.. مفيش أخبار عن يوسف؟

عماد

لسة.. بس أكيد هنوصله..

- نادية تتحدث بغضب وحزن شديد..

نادية

أنا خلاص هتجنن يا عماد.. مش فاهمة حاجة ومش عارفة
ايه اللي يخلي يوسف يختفي فجأة كدة...

عماد

جايز مش قاصد يختفي.. مانتني عارفة انه كان جايله شغل ف
الغردقة، وهو كان ناوي يروح..

نادية

انت هتهزر يا عماد، وهو يوسف هيسافر فجأة من غير ما
يقول لأهله ولا يقوللي برضو.. وكمان يسببنا في الكارثة
دي.. نفسي افهم أيه اللي حصل...

قطع

صالة جيم

- سارة فتاة عشرينية ترتدي ملابس رياضية وتقوم بعمل تمرينات في الجيم وهي تتحدث ف الموبايل..

- صالة الجيم شيك، وملئة بالشباب من الجنسين يتمرنوا..

سارة

أبوة يا ماما.. لأ يا ستي.. وحياتي عندك ما تجييلي سيرة
الموضوع ده تاني.... لأ.. عمي أيه بس.. مفيش حد مكان
أبويا.. ردي على قد السؤال ومتقوليش حاجة عني وحياتي
عندك.. انا مش ذنبي ان معندوش عيال.. لأ سوسو حبيبتي
وانتي عارفة.. بس بعيد عنه...

- تأتي إليها صديقتها (مي) وهي تمسح وجهها بفوطة بعد أدائها للتمارين، مي في عمر سارة
وبدينة الى حد ما...

مي

ما تيللا يا بنتي.. اتأخرنا ع الانتريو

- سارة توميء برأسها لـ مي، بالإيجاب..

سارة:

طب خلاص بقى يا ماما.. يللا باي دلوقتي يا حبيبتي...

قطع

فناء السجن

- فوتومونتاج للقطات سريعة تستعرض السجن من الفناء.. ملاعب وكانتين وتجمعات وحمامات.. هرج ومرج بين المساجين الى حد ما.. استعدادا للطابور.
- الصولات تنظم طابور المساجين..
- رفعت يظهر أثنياً من مكتبه الى الفناء (مرتدياً نظارة شمسية)، مع التركيز على هيئته، ثم بعدها يأتي اللواء زين مأمور السجن بزيه العسكري يتخذ موقع القائد..
- مجموعة من الضباط يقفون بأماكنهم..
- شريف وسجناء الزنزانة ضمن المساجين..
- لازال شريف صامتاً منزوي هادي..
- أحد الصولات يبلغ العميد رفعت..

الصول

الطابور جاهز يا فندم

- يتقدم رفعت الى الضباط أمام الطابور.. يظهر على المساجين ملامح الانضباط والخوف فور رؤيتهم للعميد رفعت..
- رفعت بصوت عالي.. موجهها حديثاً للعقيد إبراهيم..

رفعت

شوف التمام يا حضرة العقيد

ابراهيم

تمام يا فندم

- يتقدم العقيد إبراهيم للطابور ويقوم بعمل التمام، ويوجه حديثه الى شريف..

ابراهيم

اسمك بالكامل يا بني

- شريف لا يرد..

ابراهيم

ما ترد يله

- شريف لا يرد.. رفعت يتابع الحديث من بعيد مترقباً.. ثم يوجه حديثه لابراهيم..

رفعت

ماله ده يا سيادة العقيد

ابراهيم

مفيش يا فندم.. مستجد ولسة مش فاهم النظام

- يقول رفعت بأداء مرعب ونبرة سخرية..

رفعت

اللي مش فاهم، نفهمه

ابراهيم

كلم الباشا يله

- شريف لا يتحرك الى أن ياخذه الصول (كُرِيم) من يده الى العميد رفعت..

رفعت

فيه أيه يا بني.. مابتدش على سيادة العقيد ليه؟

- شريف لا يرد..

الصول كُرِيم

انت كمان مش هترد ع الباشا يا زبالة...

رفعت

خلاص يا سيادة العقيد.. سيبيه.... جديد يا سيدي.. دور هولي
خدمات..

ابراهيم

تمام يا باشا.. أديك جيبته لنفسك يا روح أمك.. استلقى وعدك
بقي

يأخذ الصول السجين شريف، بينما يظل رفعت ناظرا له في تحدي بالغ.

قطع

حمامات المبنى الإداري بالسجن

فوتومونتاج

- فوتومونتاج للقطات سريعة تستعرض خدمة شريف داخل حمامات المبنى الإداري للسجن، مسح الحمامات.. كل هذا وهو على نفس الأداء الصامت الباهت الذي لا يبدو منه أي تعبير سوى التعب.

- لقطات عدة تظهر شريف وهو يجمع بواقي الصابون من الحمامات ويضعها في كيس بلاستيك، الى أن يمتلئ الكيس، فيبدأ بتعبئة كيس آخر، الى أن يحمل عدة أكياس مليئة ببواقي الصابون...

قطع

مكتب العميد رفعت ف السجن

- العميد رفعت جالس على مكتبه بينما السادة الضباط يملأون المكتب من بينهم العقيد إبراهيم يتابعوا لقطات من ماتش كرة على شاشة التلفزيون (يفضل اختيار ماتش مهم في دوري حديث، ويظهر ف التلفزيون أنه برنامج تحليلي معاد، ل أحد مذيعين البرامج الرياضية.. (مدحت شلبي) على سبيل المثال..

- أجواء مزدحمة ودخان كثيف ودوشة وأكثر من حد بيتكلم في نفس الوقت، جميعهم ينظرون للتلفزيون عدا رفعت الغير مهتم..

- رفعت يقلب في الموبايل وهو يدخن، ولا يكثرث بالآخرين..

- يظهر شريف من باب مكتب العميد المفتوح وهو يمسخ الطرقة..

- الضباط يتحدثون تعليقا على الماتش مع صوت التلفزيون..

- ضابط يتحدث مع آخر، ويشاور ع التلفزيون..

ضابط 1

أهو يا باشا.. والله ما عمله حاجة..

ضابط 2

طب استنى بس أهو هيعيدوها.. شوفت شوفت.. اهو هو
كمان بيقولك معمولوش حاجة..

إبراهيم

يا نصاب منك ليه.. ده كان ناقص يجيبه من شعره، ولا رأيك
أيه يا باشا..

- رفعت غير مهتم..

رفعت

لأ.. سيب الباشا ف حاله.. لا ليا ف الكورة ولا عرفت
أحبها.. وبعدين مش الماتش ده كان امبارح.. آمال بتهروا ف
أيه؟..

إبراهيم

يا باشا ماهو ده الاستوديو التحليلي للماتش..

رفعت

لا تحليلي ولا تحليلك.. يلا خذ زمايلك وكل واحد على فصله..

ضابط 1

طب 5 دقائق يا باشا.. اعتبرها فسحة وهنجري اول ما تخلص..

رفعت

قوم يا حضرة الضابط، بدل ما أعملك جواب استدعاء ولي أمر وشكلك هيبقى وحش..

ضابط 1

لا وعلى أيه يا باشا.. خلينا بكرامتنا.. يللا يا رجالة..

- رفعت يغلق التلفزيون بالريموت.. ويهم الضباط بالخروج من الحجرة، وينادي رفعت على إبراهيم قبل خروجه..

رفعت

بقولك يا هيمما

إبراهيم:

أؤمرني يا باشا

رفعت

الواد اللي مبينطقش ده أخباره أيه؟

إبراهيم

واد مين يا باشا

رفعت

الواد بتاع طابور الصبح يا جدع

إبراهيم

ااه.. زي ماهو وكأنه بالع سد الحنك.. دورناه خدمات والصول كَرِيم، مطلع أيماناته، والواد جبلة زي ماهو.. مبينطقش..

رفعت

انا مش عاوز مشاكل، ماهو الحمار ده تلاقي محاميه حفظه الشويتين دول عشان ندوره مستشفى، وده ميحصلش يا إبراهيم.. خللي كُريم يزود العيار شوية، خلينا نشوف آخره..

إبراهيم
حصل يا باشا

يهم إبراهيم بالخروج ورفعت ينادي عليه..

رفعت

هيما...

إبراهيم
أوامرك يا باشا

رفعت

الواد ده ميصعبش عليك يا ابراهيم.. جمد قلبك شوية يا سيادة
العقيد.. تابع الصول كُريم وهو هيعرف يكدر الخ الخنزير ده
.. بس من غير ضرب.. انت فاهم.. خلينا نشوف آخره..

إبراهيم
حصل يا باشا

رفعت

ماشي ياخويا

- يرن جرس الموبايل..

رفعت

روح اعمل اللي قولتلك عليه..

إبراهيم
تمام. سيادتك

- متحدثا في الموبايل..

أيوه يا سحس.. وصلت لأيه؟.. نعم يا زرع النوى؟.. ليه
هشتري حق انتفاع الطقطوقة.. دي حبالله أسطوانة يتيمة..
لا انسى.. قول له مش همدف قرش زيادة.. إخلص ورد عليا..
سلام يا ابن النصابة..

- يهمس رفعت بأغنية فريد الأطرش بدندنه وهو مستمتع ويقلب ف الموبايل..

رفعت

يفيد بأيه الحنين من بعد حيرتي فى هواك.. كان لي بخت ف
مين لما القى بختي معاك

- ثم ينظر رفعت باستهانة من باب مكتبه على شريف وهو يمسخ سلم وطرقات المبنى الإداري

قطع

مطعم في النادي

- سارة ومي صديقتها تجلسان لتناول الغذاء في النادي.. الطعام أمام سارة بسيط وصحي الى حد ما وأغلبه سلطات، على عكس مي، التي أمامها أطباق عديدة، ويتكلمان وهما يأكلان..

مي

يا بنتي هتتشفي كدة.. ما ترحمي نفسك شوية، دانتي فايتك
كثير والنعمة..

- سارة (بضحك)..

سارة

سيبتلك الكثير ده ياختي.. أزلطي أزلطي .. مش المحروس
عاجبه كده..

- مي (بضحك)..

مي

المحروس ابن عمي تعرفيه..

يا بنتي أنا بستمع بالحياة.. والأكل أحد أهم أنواع المتع اللي
ربنا محللها..

- سارة بلؤم بنات..

سارة

يا شيخه.. طب وبالنسبة للمتعة اللي ربنا محللهاش؟

مي

مفيش متعة ربنا محللهاش.. فيه متع ليها شروط ونظام
ووقت.. واتلمي بقا عشان المحروس وصل..

- مي تشاور لطارق (صديقها) وهو يبحث عنهما وسط الطاولات وتنادي عليه..

- طارق شاب عشريني..

مي

طارق..

- يأتي طارق مسرعا نحوهما..

طارق

هاللو ازيك يا سارة..

- سارة (بضحك)..

سارة

أهلا محروس أفندي..

طارق

محروس؟

مي

سيبك منها، أصل دمها شربات النهاردة.. هتقعد ولا نتحرك؟

طارق

لا نتحرك، ده يدوبك نلحق العشا يا بطي

مي

- مي تنتظر الى الجرسون (عصام) وتنادي عليه..

طب ثانية.. عصام..

- سارة باندعاش..

سارة

عشا؟

- عصام الجرسون يأتي..

- - مي تشاورله بإيديها على الأكل بمعنى أن يلفه..

عصام

حصل أنسة مي

سارة

طب هنطلق أنا بقا.. كلميني لما ترجعي من (متعة) العشا يا بطته

قطع

قاعة في قصر ثقافة السينما

- تبدو من المنصة على مسرح القاعة أنها ندوة فنية، ضيفها الفنان "محي إسماعيل" يتوسط رجل وامرأة (يديران الندوة) ..
- يجلس رفعت وزوجته سلوى بين الحاضرين المكتظة بهم القاعة، ويبدأ المشهد بتصفيق وضحك من الجمهور
- محي إسماعيل يوجه حديثه للجمهور، وكأنه يكمل أجوبته ع الأسئلة.. بأدائه الكوميدي..

محي إسماعيل

ها.. أيه ثاني؟

رجل المنصة

طب ناخذ المرادي سؤال من الجنس اللطيف.. اتفضلي..

- يشاور على شابة من بين الحضور، ويأتي إليها أحدهم بالميكروفون..

الشابة

عاوزة اسأل حضرتك.. معروف عنك انك ملك الأدوار
المركبة، وعشان كدة لقبوك بالقيصر..

- محي إسماعيل بأداء متعالي

محي إسماعيل

أيوة..

الشابة

هل تعتقد أن أدوارك الصعبة دي ممكن تكون أثرت في
شخصيتك، عشان كدة ساعات يعني..

محي إسماعيل

ساعات أيه؟

الشابة

يعني.. حضرتك بيقالك حركات وأداء غريب وتركيبتك
يعني...

- محي إسماعيل ينفعل بأداء كوميدي..

محي إسماعيل

اقعدي يا بنت.. أداء غريب وحركات أیه.. شایفانی بقطع ف
هدومي ولا برش عليكوا مایة.. اقعدي عدل واتكلمي عوج..

- بصوت السادات..

انتي بتكلمي القيصر يا بنت

- ثم يخرج من جيبه صفارة ويصفر بيها..

محي إسماعيل

اللي بعده

يبدو على رفعت سعادته وضحكه المبالغ، بينما سلوى ممتعضة ومش طايقة نفسها..

قطع

غرفة المتحف في قصر ثقافة السينما

- رفعت وسلوى يتجولان داخل المتحف الذي يحتوي على كاميرات التصوير القديمة جدا، وشرائط السينما القديمة
- يبدو في الخارج جمع من الناس تخرج من الندوة، من بينهم محي إسماعيل، الذي يدخل على المتحف ليستقبله رفعت بحفاوة..

رفعت

مش ممكن يا قيصر.. ايه الجمال ده.. ردودك في منتهى اللباقة وخفة الدم

- محي إسماعيل يوجه حديثه لـ سلوى، ثم رفعت..

محي إسماعيل

اهلا يا مدام.. ازيك يا رفعت باشا.. ماهو ده العادي بتاعي..

رفعت

طب صورة بقا

- يهم رفعت ليأخذ صورة سيلفي مع محي إسماعيل وسلوى بجانبه.. بينما تخرج سلوى من وقفة الصورة ويبدو عليها الضيق ويستمر رفعت في التصوير مع محي إسماعيل، بعد أن نظر لسلوى ويبدو عليه الحرج والضيق..

قطع

غرفة المكتب في بيت رفعت

- مكتب شيك به مكتبه مليئة بالكتب، مكتب.. وحائط عليه عشرات الصور لرفعت مع العديد من نجوم الفن..

- لقطة للبرينتر (الطابعة) وهي تخرج صورة رفعت مع محي إسماعيل، ويأخذها رفعت ويتم هذا أثناء الحوار التالي..

- رفعت موجه حديثه لسلوى التي تنظر اليه بغضب..

رفعت

ممكن أفهم أيه اللي عملتيه النهاردة ده.. بتخرجيني مع الفنان؟

- يأخذ رفعت الصورة ويقصها ليضعها في برواز..

سلوى

انت عارف اني مقصدش أخرجك.. بس انا بصراحة زهقت..

- وتخرج غاضبة من الحجرة، بينما رفعت يكون أكمل بروزة الصورة ويضعها على الحائط بجوار الصور المشابهة، ويظهر الحائط كاملاً به صور رفعت مع الفنانين وفي الندوات والمعارض..

قطع

طرقات مبنى السجن

- العميد رفعت يترجل الى مكتبه.. يرد التحية للضباط والعساكر.. يرى أحد المساجين (مسعود)، جالس على الأرض فـ الطريقة، وجواره عسكري.. مسعود رجل أربعيني يبدو عليه الإعياء الشديد، والبؤس الشديد..
- يظهر الضيق الشديد على رفعت فور رؤيته لـ مسعود..
- رفعت للعسكري بعنف..

رفعت

الواد ده بيعمل أيه هنا؟

- العسكري يعطي التحية لرفعت ويرد متلهوِّجًا..

العسكري

متحول عيادة يا فندم، ونادر باشا بيأشر ع التحويل وقاللي
استنى هنا..

- رفعت للعسكري بعنف..

رفعت

مفيش حاجة اسمها تستنى هنا.. اتفضل

خد الزفت ده من هنا وبلغ الراند نادر يجيلي

العسكري

تمام يا فندم

- العسكري يوقف المسجون مسعود ببطء..

- رفعت بز عيق..

رفعت

اتحرك يا بني آدم..

- يقيم العسكري المسجون مسعود بصعوبة..

- بينما العميد رفعت يظل واقفًا مصوبًا نظراته نحو المسجون مسعود وكأن هناك عداً بينهم..

- يظل رفعت واقفًا ناظرًا نحو مسعود، الى أن يرى الضابط نادر خارجًا من أحد الغرف متجهًا نحو العسكري والمسجون، فيراه رفعت، وينادي عليه بصوت عالي..

رفعت

حضرة الرائد نادر..

- نادر ينظر للخلف ليرى رفعت..

رفعت

تعالى

- نادر يأتي لرفعت مسرعًا..

نادر

تمام يا فندم

رفعت

مش انا قايل الواد ده ميعتبش المبنى الإداري؟..

نادر

معلش يا فندم.. انا كنت بس...

- رفعت مقاطعًا، ويتحدث بحدة..

رفعت

قايل ولا مش قايل؟..

نادر

حصل يا باشا..

رفعت

لو شوفته تاني هنفذ فيه الحكم قبل معاده..

نادر

انا بس يا فندم مش فاهم اشمعنى مسعود..

رفعت

مش شغلك يا حضرة الضابط.. الأوامر تتنفذ وبس

اتفضل

قطع

مكتب اللواء "زين الدين شوكت" مأمور السجن

- رفعت جالس أمام زين في مكتبه ..

- زين يتحدث في التليفون ..

زين

تمام يا فندم، سيادتك متقلقش، العيال دي متسيطر عليها، وتم
استبعادهم .. اتطمئن سيادتك ..

يغلق زين التليفون ويوجه حديثه لرفعت

زين

أديك سامع بنفسك .. اتصرف بقا مش ناقصين دوشة

يأخذ زين قرص من الدواء ويشرب المياه ..

رفعت

يا باشا كلهم ف الخلاط، شوية العيال دول تحت جزمتي،
مفيش عيل فيهم هيتنفس تاني ..

زين

يخرب بيت دماغك دي، يابني احنا دفعة واحدة ولولا أسلوبك
ده كان زمانك مكاني، هدي اللعب يا رفعت، مش عاوزين
نسمعنا كلمتين .. لا في نفس ولا صحة .. خلينا نطلع منها
على خير ..

رفعت

سلامتك يا زين .. انت عارف أنا أعرف أوجع من غير ما
استخدم إيدي .. وبعدين هو انا كنت هقبل ان حد غيرك يمسخها
ويتنطط عليا برضو ..

- يضحكون ضحك أصدقاء ..

زين

وهو انت حد يعرف يتنطط عليك يا سيادة العميد .. دانت بتنطط
علينا وعلى أهالينا ..

- يضحكان ..

- بأداء ممتن..

رفعت

عيب عليك.. يا زين انت عشرة عمر، خد بالك من صحتك
بس ومتشغلش بالك..

قطع

مكتب رفعت في السجن

يجلسون حوالي 4 من الضباط في مكتب العميد رفعت، بينهم إبراهيم، ومعهم الصول كُريم.. ويتناوبوا الحديث، بينما شريف يقوم بمسح الطرقات خارج المكتب..

ضابط 1:

يا باشا، انا بصراحة كان طموحي حاجة تاني خالص..
مبقولش ان قطاع السجن وحش لا سمح الله.. بس قصدي
كان نفسي ف المرحلة اللي قبل السجن..

- بأداء ضاحك..

ضابط 2

اللي قبل السجن تأمين الجلسات

إبراهيم

يعني عاوز انت تجيب المجرم، مش تستلمه جاهز..

- رفعت وهو يدخن..

رفعت

يعني احنا وفرنا عليك الضبطيات والعمليات وضرب النار
والدوشة، وف الآخر كمان مش عجبك.. خلاص انت حر..

- بأداء قلق..

ضابط 1

حر ازاي يا باشا؟..

- رفعت يحاول يطفئ السجارة في الطفاية، بينما يجدها مليئة ومتسخة، ينظر الى الخارج ليجد شريف..

- ينده رفعت على شريف وهو يتحدث مع الضباط..

رفعت

انت يا بني، تعالى خد الطفاية دي نصفها..

- يأتي شريف ببطء ورفعت يتحدث..

رفعت

ولا حاجة يا حضرة الظابط، نعمل تأشيرة صغيرة للوزارة
بتوصية لنقلك عمليات (ج) في العريش.. وأوعدك انا اللي
هستلم منك الضبطيات اللي هترحلها لنا..

- الجميع يضحكون..

- بينما شريف وهو يمد يده يأخذ الطفاية يتشكل في رجل أحد الضباط، ويقع بالطفاية على
مكتب رفعت، ومنها على الأرض لتتكسر..

- يركل رفعت شريف برجله ليقع على الأرض..

- ضابط 2 بأداء منفعل ومهين..

ظابط 2

يخربيتك.. مش تاخذ بالك يا جحش انت..

- رفعت يتوعد شريف..

رفعت

وله.. اتظبط يله بدل ما أظبطك يا روح أمك.. انا معنديش
مذنب يتتطط هنا..

- رفعت ينظر الى ابراهيم..

رفعت

حبس انفرادي يا ابراهيم..

إبراهيم

تمام يا فندم

- رفعت يتوعد شريف بعنف..

رفعت

وحياة اللي جابني هنا.. ما هتشوف النور غير لما اسمع
صوت أمك..

- يتجه الصول كُريم نحو شريف ويجذبه من ملابسه تمهيداً لضربة.. ويتحدث بتوعد..

كُريم

وعلى أيه تستنى يا باشا.. أنا هسمعك صوت أمه دلوقتي..

- رفعت بصوت عالي..

رفعت

كريم.. متمدش أيدك عليه..

كريم

يا باشا أصبر عليا بس....

- رفعت يأمر بصوت أعلى وتوعد..

رفعت

بقولك متمدش أيدك ع الواد ده.. فاهم؟

- كريم يترك شريف وكأنه أخرج ..

- شريف يطيل النظر لرفعت بأداء ممتن..

- رفعت ينظر الى الضباط..

رفعت

الواد ده جلسته امتي؟..

أحد الضباط

الأسبوع الجاي يا فندم..

- رفعت يوجه حديثه لابراهيم..

رفعت

إبراهيم.. مفيش لا اورنيك عيادة ولا مستشفى غير بتأشيرة

مني شخصيا.. لحد ما نشوف اخرة أمه إيه ده..

- شريف ملامحه ثابتة ولا تنم عن أي انطباع

قطع

حجرة استقبال الضيوف ف السجن

- الحجرة واسعة وملينة بالمصورين والمساعدين والكاميرات ووحدات الإضاءة لتصوير برنامج تليفزيوني، مع وجود بعض الضباط..
- المذبة تمسك الميكروفون وأمامها المسجون مسعود، والكاميرا تصورهم..
- العميد رفعت يقف بعيداً يراقب الموقف وينظر بتأفف، ويهم بإشعال سيجارة..
- يأتي له أحد مساعدين التصوير مسرعاً..

مساعد المصور

معلش بعد اذنك يا فندم.. مفيش تدخين عشان بيطلع ف
التصوير..

- ينظر له العميد رفعت نظرة غاضبة أخافت المصور، ثم نظر الى العقيد إبراهيم، نظرة مفهومها التصرف، ويستمر في التدخين..
- يأتي إبراهيم مسرعاً للمصور، ويجذبه من يده..

إبراهيم

تعالى يابني من هنا.. شوف شغلك

- صوت المخرج..

ص.

صووت.. ثري تو وان.. أكشن

- المذبة توجه حديثها للكاميرا وأمامها المسجون مسعود، وتتحدث بأداء مفتعل ومستفز..

المذبة

لقاءنا النهاردة مع المجرم صاحب الحادثة الأشهر والأهم ف
الشهور الأخيرة، واللي أصبحت تريند وقضية رأي عام لما
بها من وحشية لا تمت للإنسانية بصلة..

معانا مسعود المجرم اللي قتل مراته وأبناءه الثلاثة بدم بارد..
المجرم اللي تجرد قلبه من أي ذرة إنسانية أو رحمة ليفتك
بدماء أطفال أبرياء لا حول لهم ولا قوة.. جريمة هزت مصر
والعالم من هول بشاعتها.. جريمة مش ممكن تحصل في عالم
الحيوانات.. ده ميستاهلش حتى اني أوصفه بالحيوان.. وأديه

واقف قدامي زي الفار بعد ما تمكن رجال الشرطة من القبض عليه.....

- رفعت يخرج عن شعوره، ويقطع التصوير منفعلا..

رفعت

أيه ده.. أيه ده؟.. أيه اللي حضرتك بتقوليه ده؟

أيه هو اللي حيوان وفار.. انتي ازاي بتتكلمي كدة؟.. هو ده الحوار التلفزيوني؟..

- المذبة منزعة وتتحدث بأداء متعال..

المذبة

فيه ايه يا فندم.. حضرتك ليه بتوقف التصوير، وبعدين عاوزني أوصف مجرم ارتكب الجريمة دي بأيه؟.. أقول الغلبان الكيوت اللي مقدرش يمسك أعصابه وقتل مراته وولاده...

رفعت

اتكلمي معايا كويس من فضلك.. انتي جاية تعملي معاه حوار.. لكن غير مسموح بأهانة أي نزيل عندي، مهما كانت جريمته.. وبعدين ده لسة مخدش حكم يعني قدام القانون مش مجرم أصلا..

المذبة

أه بس هو معترف..

رفعت

وانتي مالك.. ده مش مشغلك.. هو هنا بأمر محكمة، ولو اتحكم عليه بسجن أو اعدام برضو بأمر محكمة، والحكم ده هو العقاب.. مش إهانة سعادتك انتي والتريند بتاعك.. ده ميحصلش عندي هنا ف السجن.. اتفضلتي لو سمحتي...

- رفعت يشير للمذبة بالخروج..

المذبة

يا فندم انا معايا تصريح بالتصوير..

رفعت

اتفضلني اطلعي برة انتي والتصريح بتاعك.. مفيش تصوير..

- يشير للمذبة بالخروج، ويوجه حديث لابراهيم..

رفعت

إبراهيم.. كاميرات الأساتذة صورت الحوارات دي كلها..
الشرايط تطلع ويتمسح اللي عليها فوراً..

مساعد التصوير

مفيش شرايط

رفعت

الديسكات.. كروت الميموري.. تتأخذ وتمسح يا إبراهيم

- بأداء حاد جداً..

- ثم ينظر لمسعود المتهم بتأفف، ويشير للعساكر..

رفعت

خدو ده من هنا..

- المذبة تهم بالخروج، وهي تتوعد..

المذبة

انا مضطرة أقدم شكوى للوزارة باللي حصل

رفعت

شرفتي يا مدام

- إبراهيم والضباط يأخذون الكاميرات من المصورين..

قطع

بيت رفعت

الريسبشن

- سلوى تحضر نسكافيه لها ولسارة التي تقف أمامها في المطبخ الأمريكي

سلوى

يا بنتي والنعمة انتي اللي مزوداها.. أينعم عمك ساعات بيبقى
رخم و ساعات دماغه بتقفل كدة.. بس ف الآخر تلاقيه زي
الطفل الصغير اللي بيدور على لعبة تفرحه..

سارة

وانا بقا مش هيقاله اللعبة دي، انا مش بنته ومش ذنبي ان هو...

- تصمت سارة فجأة..

- تتغير ملا مح سلوى لانكسار وحزن

سلوى

صح يا سارة

- سارة بطيبة ويبدو أنها تنبهت لمراعاة شعور سلوى..

سارة

سوسو، وحياتك مش قصدي وطول عمري بدعي ربنا يرزقكم
بالخلفة عشانك انتي.. وعشان أخلص من ابوته اللي عاوز
يفرضها عليا بالعافية دي..

سلوى:

يا بنتي حرام عليك.. رفعت مكانش يعرف بتعب أبوكي ولا
حد فيكوا كلمه.. انتي إحساسك رافضه وبتعامله كأنه ليه أيد
ف موته..

سارة:

تفتكري يعني انا مبسوطه باللي انا فيه.. انا أكثر حد ف الدنيا
محتاجاله.. ويمكن أكثر منك.. بس انتي عارفه انه هو اللي
كان مقاطع ابويا.. وعامل فيها ابوه اللي غضبان من
تصرفاته.. وكان عاوزه يبقى نسخته منه.. ويوم ما تعب

محدث فينا عرف يتصرف.. مش جايز لو هو كان موجود..
كنا لحقنا بابا..

- تبكي سارة..

- سلوى بحنية أم..

سلوى

لا حول الله.. بقا ده كلام تقوله البرنسياسة سارة خريجة ال
ايه يو سي؟..

- سلوى بحكمة على دعابة..

أولا قضاء ربنا مينفعش نتكلم فيه.. ثانيا.. مش عمك كان
غضبان من ابوكي عشان ساب الشرطة واشتغل ف الحاجة
اللي بيحبها .. تعالى شوفي الهم اللي معيشنا فيه .. ده هو
اللي كان أولى واحسنه 100 مرة يسيب الشرطة ويشتغل
فنان...

- سارة بضحك..

سارة

فنان ايه بس بشنبه ده..

سلوى:

أكيد كان هيبقى مونولوجيست أد الدنيا

- سلوى وسارة يضحكان ..

قطع

مكتب رفعت في السجن

- صوت إسماعيل يس يغني مونولوج (ما تستعجبش.. ما تستغربش) ..
- رفعت جالس في مكتبه مندمج مع مونولوج إسماعيل يس ويغني معه بأداء كوميدي يترجم نهاية المشهد السابق، وهو يشرب الشاي بلبلن، وف يده بقسماط ومنتعش..

رفعت:

ما تستعجبش.. ما تستغربش.. فيه ناس بتكسب ولا تتعشبش

و ناس بتتعب ولا تكسبش.. ما تستعجبش ما تستغربش

- يدخل عليه اللواء زين مأمور السجن، ويقف رفعت مندفعاً ويبدو عليه الحرج..

زين

أخراي عليك يا رفعت.. سُمعة برضو؟

رفعت

مانت عارف يا فندم.. ده العشق القديم..

زين

انت هتقوللي.. أيّاام.. كنت خاوتنا بميلوك اللي مش لايقة
عليك خالص دي..

- يضحكان من القلب..

- رفعت بأداء إسماعيل يس.. ضاحكاً..

رفعت:

ما تستعجبش.. ما تستغربش

- يضحكان من القلب..

رفعت

طب سيادتك لو قولتلي المونولوج ده تلحين مين، هديك اللي
انت عاوزه..

- زين يضحك..

زين

تفتكر كدة هتديني أيه؟.. طب أنا ف عرض أجازة عشان
شوية الأمراض اللي عندي دي.. أيه رأيك بقا..

رفعت

يا ريت كان بأيدي يا فندم.. ماهو سيادتك بقا سبقت وقعدت ع
الكرسي..

زين

يا سيدي مش عاوز حاجة.. ع العموم انا كدة كدة مش هعرف
مين ملحن المونولوج..

رفعت

تصور انه إسماعيل يس هو نفسه اللي لحنه

- زين باند هاش..

زين

يا راجل.. متقولش..

رفعت

والله زي ما بقول لسيادتك كدة.. ماهو أصلا إسماعيل يس
مبتدأش ممثل...

- زين مقاطعاً..

زين

بقولك أيه وحياة أبوك.. انت لو فتحت مش هتقفل.. خلص
خدمتك واعملك قناة ع اليويتوب تطلع فيها مواهبك دي كلها..

رفعت

تيك توك بقا يا فندم.. بيكسب

- الاثنان يضحكان..

زين

طب كبس بقا يا سيادة العميد..

- رفعت بأداء ضاحك.. بأداء ال تيك توك..

رفعت

أرحب يا فندم

- الاثنان يضحكان..

- زين وكأنه تذكر..

زين

يا أخي الله يجازيك.. نسيتني أنا جايك ف أيه.. أه.. أنا هبلغ
رئيس القطاع أني هزودلك شوية صلاحيات مأمور، عشان
ظروفي الصحية.. معلى يا رفعت شيل عني شوية لحد ما
ربنا يمن عليا بالشفاء..

- رفعت بأداء أخوي محب..

رفعت

عينيا ليك يا زين.. انت عارف انا ف ضهرك من واحنا طلبه..
وباذن الله شوية تعب وهيعدوا وترجع أحسن م الأول..

زين:

كله ع الله.. هبعثك صورة م القرار تستلمه وتوزعه ع
المصلحة بعد التأشيرة

قطع

زنزانة شريف الانفرادي

- يجلس شريف ع الأرض في الزنزانة الانفرادية في ركن يتجمع حوله بعض الضوء المنبعث من الشباك..

- حوله أكياس مليئة ببقايا الصابون، وورق جرايد، وف يده قطعة خشب صغيرة ينحت بها ف مجسم الصابون.. ليشكل تحفة فنية غير واضح معالمها، تظهر بالتدريج وهو مندمج ومستغرق في نحتها وتشكيلها.. لتبدو في النهاية تحفة فنية تشبه المركب..

قطع

مكتب رفعت في السجن

- يدخل إبراهيم حاملا في يده المنحوتة الفنية التي شكلها شريف في المشهد السابق..
- تبدو المنحوتة أكثر وضوحًا.. وهي على شكل مركب به تجويف، لتستخدم كطفاية..
- يقدمها إبراهيم لـ العميد رفعت بأداء المفاجئة..

إبراهيم

أيه رأي سيادتك يا فندم؟

- رفعت منبهراً..

رفعت

وااااا.. ايه الروووعة دي.. استلقطتها منين دي يا واد؟...

إبراهيم

مش هتصدق يا فندم

- رفعت ضاحكاً..

رفعت

لأ هصدق.. ماهو أي حاجة ممكن أصدقها غير أنك تكون
شاري تحفة فنية..

إبراهيم

الواد السجين يا فندم اللي ف الانفرادي

- رفعت مندهشاً..

رفعت

الاخرس؟

إبراهيم

اه يا فندم اللي مبينطقش ده.. اتاري ابن الوارمة كان بيجمع
بواقى الصابون لما دورناه خدمات، وقعد ينحت الطفاية دي
ف الانفرادي بدل اللي كسرهما لسيادتك..

- رفعت ينهر ويأخذ منه المنحوتة ويمسكها باعجاب بالغ، ويرفعها بيده وينظر اليها من كل جانب ليؤكد فهمه في الأعمال الفنية و في روعة النحت..

- رفعت بأداء الانبهار وعدم التصديق..

رفعت

عاوز تفهمني ان الواد الشلحف المنيل على عينه ده، ده هو اللي ناحت التحفة دي؟

ایراہیم:

تمام یا فندم

- رفعت بصيغة إعجاب..

رفعت

يا ابن الكالب..

- باهتمام..

رفعت

عاوز أشوف ملف الواد ده يا هيماء، وطلعه م الانفرادي وهاتيهولي..

ایراہیم

حالا یا فندم

رفعت

لأ مش النهاردة.. هاتھولي بكرة عشان لازم أجري دلوقتي..
عيد ميلاد سلوى يا سيدي، وانت عارف بقاءا

- إبراهيم مداعبًا مديره..

ایراہیم

أه يا فقدم، كل سنة ومدام سلوى طيبة.. طبعًا سيادتكم لو
اتأخرت ممكن تدوركم مكتب.. أو تذكرك خميس وجمعة

- إبراهيم يضحك منفرداً..

- رفعت بجدية، وحدة..

رفعت

شد نفسك يا حضرة العقيد

- إبراهيم محرّجًا.. يؤدي التحية العسكرية..

إبراهيم

تمام يا فندم

- رفعت يبدأ بجدية ثم يكمل ضاحكًا..

رفعت

انت مش عارفني ولا أيه.. أنا ميفرقش معايا لا مكتب ولا
أجازة.. انا كل اللي يفرق معايا أنها تقفل الميز .. أو تمنع
عني التعيين..

- رفعت وإبراهيم يضحكان من القلب

- إبراهيم يتنفس الصعداء..

إبراهيم

خضتني يا فندم

- استمرار في الضحك..

قطع

منزل رفعت

(عيد ميلاد سلوى)

- حضور كثير.. رجال ونساء وأطفال.. أجواء عيد الميلاد بعد إطفاء الشموع..
- استعراض للمنزل والموسيقى الخاصة بأعياد الميلاد.. مع هرج ومرج الأطفال.. وضوضاء الحضور، الذين يحملون أطباق التورتة..
- رفعت يقف بجوار البلكونة، مراقبًا سارة مع نظرة أبوية..
- سارة ترى رفعت، فتدير وجهها سريعًا.. ثم تضع طبق قطعة التورتة على المنضدة، وتذهب بأداء عاجل الى سلوى التي تقف مع الضيوف من السيدات ويضحكون..
- سارة تحدث سلوى بحب، بينما تنهي جملتها بنظرة مفهومها انتي عارفة اللي فيها..

سارة

حبيبتي يا سوسو.. كل سنة وانتى طيبة يا قمر.. معلش.. كان
نفسى أقعد أكثر من كدة.. بس حلو كدة أوي.. هبقى اكلمك..

- سارة تقبل سلوى..

- سلوى بحب..

سلوى

براحتك يا عندية

- سارة تخرج..

- سلوى تتفقد الضيوف وتنظر يمينًا ويسارًا باحثة عن رفعت.. لتلمحه ف البلكونة، ثم تتوجه نحوه..

قطع

بلكونة منزل رفعت

- تدخل سلوى البلكونة..
- رفعت يقف مستنداً على سور البلكونة يدخن سيجاره، ويبدو عليه الضيق الشديد..
- سلوى لرفعت بأداء غزلي..

سلوى

قاعد لوحذك ليه يا جميل

- رفعت برد فعل سريع مخنوق..

رفعت

نفسى أعرف هي بتفكر ازاي.. أي اخوات بيحصل بينهم
خلافات عادي وبيتصالحوا بعد كدة.. محملاني مسئولية موت
أبوها يا سلوى..

- سلوى بطيبة وحكمة..

سلوى

بص للموضوع من نظرتها هي.. بنت عيلة مالهاش حد غير
أبوها وأمها.. فجأة لقت أبوها بيروح منهم.. وهي طفلة
وامها مش عارفة تتصرف.. بالنسبالها الموضوع مش
سهل..

رفعت

وهي لو رانيا كانت اتصلت بيا، كنت هسيبهم؟.. ده وارد
يحصل مع أي حد، بعدين شوقي ده كان ابني مش اخويا
الصغير.. والمفروض ان الهانم دي تبقى ف حضني دلوقتي،
دانا كنت حاسس ان ربنا مرزقنيش بأولاد، عشان أربي بنت
أخويا.. هي حتى حرمتني م الإحساس ده..

- رفعت بخنفة..

رفعت

شوفتي بتسلم عليا ازاي وهي مدية وشها الناحية الثانية؟..
ولا كأنها طايفة تبص ف وشي..

- سلوى محاولة الهاءه عن الموضوع..

سلوى

طب انا ذنبى ايه ف النكد ده ف يوم زي ده.. مش كفاية انك
جايبلى هدية عيد ميلادي طفاية.. طفاية يا سيادة العميد.. هو
أنا عمري دخنت يا مفترى.. وكمان م الشمع...

- انسيرت لقطة للطفاية التي نحتها شريف موضوعة على بوفيه المنزل..
- رفعت مداعبًا..

رفعت

لا.. صابون..

- مداعبة ومندهشة..

سلوى

وكمان صابون...

- رفعت بإعجاب..

- ثم بحب..

رفعت

بس بزمتهك مش تحفة فنية؟.. دي هاند ميد دي مش أي كلام..
وبعدين ماهي دي فتح كلام بس، الكلام الكبير جاي ف
السكة..

- سلوى تبتسم ف عين رفعت وتحضنه وتقبله..

قطع

مكتب رفعت في السجن

- رفعت يجلس على مكتبه..

- يدخل عليه عسكري ممسكًا بشريف، العسكري يؤدي التحية..

العسكري

تمام يا فندم

رفعت

سيبه وروح انت

- رفعت موجهًا كلامه لشريف بطيبة مع حزم بحكم منصبه، بعكس الأداء الحاد المحتقر كما في السابق..

رفعت

تعالى يله.. انت أيه حكايتك

- شريف صامت.. وجه بلا تعبيرات..

- رفعت بأداء أبوي..

رفعت:

بص يا شريف.. انا اتأكدت انك مش عامل الشويتين دول
عشان تتحول للمستشفى ولا الكلام ده.. لكن مينفعش يابني
تفضل عايشلنا ف دور الصامت الغامض ده.. الكلام ده
مينفعش..

- شريف صامت..

- رفعت بأداء أبوي عطوف

رفعت:

ع العموم انا من بعد ما شوفت فنك وطلعت فنان وموهوب،
مش هبقى حابب اكدرك.. يعني ع الأقل تقديرًا للفن، مش
عشانك انت.. بس طبعًا ده ف حالة انك متعملش حاجة
تستوجب اني أعاقبك.. انت شكلك ابن ناس ولسة صغير.. انا
لو كنت خلفت كان زماني عندي ابن ف سنك..

- شريف ينظر اليه لأول مرة.. مع استمرار صمته..

- رفعت بأداء المشجع..

رفعت

طيب .. تقدر تعملنا منحوتة فنية زي اللي عملتها بالصابون تاني؟

- شريف يومئ برأسه إيماءة خفيفة إيجاباً.. مع ابتسامه خفيفة تؤكد استعداداه..

رفعت

كويس أوي..

- رفعت وكأنه أتنه فكرة أفضل..

ولا أقولك.. تقدر تعمل حاجة تاني.. بس أصعب شويتين م
الطفاية؟..

- يومئ شريف برأسه تكررًا بالإيجاب..

رفعت

طب هایل

يمسك رفعت بالتليفون ويتحدث..

رفعت

اه يا إبراهيم.. عاوزك تصرف 10 كراتين صابون لـ شريف..
المتهم شريف.. تمام؟..

قبل أن يغلق..

بقولك.. اوضة الكمبيوتر القديمة.. لسة فاضية؟

قطع

حجرة في المبنى الإداري للسجن

فوتومونتاج

حجرة يبدو أنها غير مستخدمة في المبنى الإداري بالسجن، بها لمبات اضاءة كالمكاتب.. بها بعض الكرايب الخاصة بمتعلقات الكمبيوتر من أسلاك وشاشات قديمة وكيسات وأجهزة، متراكمة في جانب الحجرة..

- يجلس شريف على الأرض بين أدوات عديدة من عدد وصابون مجمع في أكياس وفي أطباق بلاستيكية..

- يظهر شريف وهو منسجم وفي عمل منحوتة ضخمة عن السابقة ، وهو مستغرق ف النحت بأداء احترافي..

- ملامحه أكثر راحة عن ذي قبل.. يبدو أنه مستمتع دون تعبيرات من وجهه..

- لقطات عديدة متتالية لنحت شريف للمجسم.. الى أن يظهر بالتدريج شيئاً فشيئاً.. حتى يتضح أنه مبنى (قلعة السجن)، ويعلوها علم مصر.. تكوين المجسم ونحته يبدو رائع.

- لقطة (انسيرت) على المنحوتة تمزج بالمشهد التالي

مزج

مكتب رفعت في السجن

- لقطة مكبرة لقلعة السجن التي نحتها شريف وهي موضوعة في مكتب العميد رفعت على طاولة شيك كلاسيك.. وكأنها خصيصا لها..
- يقف أمامها رفعت منبهرًا ومزهوًا بالعمل الفني، بينما يقف بجواره إبراهيم معجبًا بالعمل دون انبهار مبالغ..
- رفعت محدثًا إبراهيم بأداء منبهر ومعجب ..

رفعت

- مش ممكن.. انت عارف ان نحتاية زي دي وبالمستوى ده،
- ف أي حنة ف الدنيا تتحط ف متحف.. مش ممكن الجمال ده..
- إبراهيم يهز رأسه مؤكدًا على كلام رفعت ..
- رفعت بهزار وتريقة ..

رفعت

- معلش يا هيماء.. انا عارف انك كفتجي واكثر حاجة بتثير
- مشاعرك الفياضة طاجن عكاوي وحلة محشي.. بس ع الأقل
- هتكون شاي ف حاجة يعني م اللي انا شايها..
- إبراهيم

والله انت ظالمني يا باشا؟؟ دانا فنان على فكرة، حتى اسأل
 اللواء عبد الرحمن،.. ماه كان مخليني المسنول عن الحفلات
 اللي كنا بنعملها ف القطاع من كتر مانا فنان..

- رفعت بهزار وتريقة ..

رفعت

- يا هيماء بلاش انت.. دانتي آخر مرة جيبتي احمد فهمي بتاع
- سمير وشهير وراسك والف سيف انه يعني..

- رفعت يضحك ..
- إبراهيم معلًا يضحك ..

إبراهيم

طب انا مالي يا باشا؟.. ماهم قالولي المطرب احمد فهمي، انا
مالي بقا (واما) وللا (ريح المدام).. وانا هخمن..

- رفعت يضحك، ويعلق بسخرية ..

رفعت

لأ فنان.. طب كنت أسألني يا جدع..

- إبراهيم محرجًا ..

إبراهيم

نصيب بقا يا باشا..

رفعت

طب اعمل حسابك بقا.. حفلة المولد النبوي بعد أسبوعين
خصيمك النبي متصرفش من دماغك، وتعالالي وأنا أقولك تعمل إيه

إبراهيم

أساسي يا باشا.. طب تحب نجيب منشدين زي كل سنة؟

رفعت

خليها شعبي.. بص.. هات محمود الليثي، هيقول معاك ف
كله.. انشاد تلاقى.. شعبي تلاقى..

إبراهيم

حصل يا باشا.. من بكرة هنبتي ف التجهيزات

- رفعت لا ينتبه إليه ويدقق النظر ف تفاصيل المنحوتة، ومنشغل بها..

- إبراهيم يتماشي مع رفعت، ناظرًا للمنحوتة..

إبراهيم

بصراحة الواد جامد يا باشا، بقا العيل السُّهُن ده يعمل كدة..
بس بايضاله ف القفص يا باشا انه وقع مع سيادتك..

- رفعت مش فاهم..

رفعت

قفص ايه يا واد

- إبراهيم بلوم وابتسامة..

إبراهيم

قصدي يعني أمه دعياله.. أوضة بأدوات وعدد .. دلح برضو..

- رفعت معللا بهذار..

رفعت:

اتوكس.. دلح ايه يابني، ده الواد مفشوخ ف الشغل ده،
وبعدين ماهو السجن بيظفي 11 بلليل، أيه.. هنورهوله
عشان ينحت.. هنا يشتغل بمزاج بعيد عن القرف اللي هناك..
جيبتي ملفه صحيح؟

- إبراهيم يعود لجدية العمل..

إبراهيم:

حصل يا باشا.. على مكتب سعادتك

رفعت

طب روح انت خد التمام وانا هحصلك

إبراهيم

تمام يا باشا

- يخرج إبراهيم، بينما رفعت يقترب من المنحوتة ويبدأ ف تصويرها بالموبايل من عدة جهات
وظاهر عليه الإعجاب والانبهار الشديد.

قطع

دار القضاء العالي من الخارج

مشهد قطع

- لقطة عامة لدار القضاء العالي من الخارج، مع مزج صوت الحاجب في المشهد القادم...

مزج

قاعة المحكمة

جلسة شريف

- أجواء جلسة المحاكمة.. شريف ف القفص بزيه الأبيض..
- عماد ونادية بين الحاضرين ناظرين الى شريف.. بجوار نادية صديقتها التي تواسيها..
- يدخل القاضي والمستشارين..
- صوت حاجب المحكمة..

ص. الحاجب

محكمة

- القاضي يشير بالجلوس

القاضي

نادي ع القضية الألى

الحاجب

قضية رقم 7803 لسنة 2022 - المتهم شريف عبدالله البنهاوي

- يقف محامي شاب من منصة المحامين..

المحامي

حاضر عن المتهم

القاضي

مرافعتك يا أستاذ

قطع

قاعة المحكمة

جلسة شريف

(فوتومونتاج)

- فوتومونتاج للقطات سريعة متتابعة لمرافعة المحامي.. مع عدم ظهور الصوت
- أداء المحامي ينم على أنه محبط، من تعبيرات وجهه ف ردوده على أسئلة القاضي، وكأنه مش لاقى حاجة يقولها..
- لقطات للقاضي وكأنه يوجه سؤال للمتهم شريف، بينما شريف لا يرد وكأنه غير منتبه..
- ملامح عماد ونادية حزينة جدا ويبدو عليهما القلق الخوف..

قطع

دار القضاء العالي

جلسة شريف

- انتهت المرافعة ويجلس المحامي مكانه

- القاضي موجه حديثه للمحامي..

القاضي

يا أستاذ، احنا سمعنا قبل كدة لشهود الاثبات اللي أكدوا واقعة القتل العمد، والشاهد الوحيد اللي حضرتهك طالب شهادته.. مفيش قطع أنه شاهد نفي لعدم التحقيق معاه.. حسب عريضة سيادتك.. اللي هو اسمه...

- ينظر ف الملفات أمامه...

اسمه يوسف مصطفى عبد الودود.. مختفي.. واختفاءه لا يعطي للمحكمة أي انطباع لاحتمالية براءة المتهم لضعف شهادته أمام شهود الاثبات، خاصة وان حسب التحقيقات أهله بيدعوا أنه بيعمل ف الغردقة وليس معهم عنوانه أو تليفونه.. وعلى ذلك سيكون التأجيل لحين ظهور دليل مادي أو شهادة مؤكدة تغير من مجرى القضية..

تؤجل القضية لجلسة 20 مارس 2023

قطع

شوارع القاهرة

سيارة عماد

- يقود عماد السيارة وبجواره ناديه، وتجلس ف الخلف صديقته..

- عماد بيأس شديد..

عماد

انا دماغي هتفجر.. آيه.. خلاص كدة شريف هيروح؟....

- ناديه بحزن شديد وبكاء متقطع..

ناديه

ابوس ايدك اوعى تقول كدة.. انا مش قادرة استحمل.. الأمور

كلها بتتنيل أكثر ومفيش حل..

- عماد بغيط وغل، واستغراب مما يحدث..

عماد

هموت واعرف الكلب اللي اسمه يوسف ده اختفى فين.. دي

اخرتها يا يوسف..

فيه آيه.. وايه اللي بيحصل مش قادر أفكر...

ناديه

مانت سمعت القاضي قال انه شهادته ضعيفة.. تفتكر يعني لو

موجود كانت هتفرق...

صديقة ناديه

هو طالما اختفى ف الوقت ده، يبقى أكيد ليه علاقة

بالموضوع، مستحيل يعني تكون صدفة...

- ناديه بكاء وتوسل

ناديه

ربنا يستر... عشان خاطر ماما يا رب

قطع

مكتب رفعت في السجن

- رفعت جالس على مكتبه يتفحص ملف شريف، باهتمام..
- غلاف الملف عليه بيانات شريف..
- الاسم: شريف عبدالله البنهاوي
- القضية رقم 7803 لسنة 2022
- تاريخ الحبس: 17 أكتوبر 2022 .
- رفعت يقلب ليجد صور الفيش وبيانات التحقيق وقرارات النيابة، ومذكرة الترحيل، وأوراق القضية..
- يبدو على رفعت الاهتمام والتركيز والاندهاش مما تبين له من الملف ويبدو أنه يفكر او سرحان..
- يدخل عليه إبراهيم

إبراهيم

المسرح جاهز يا باشا، وكله تمام، والنزلاء مبسوطين
بالعروض

رفعت

طب هايل.. انا شوية وجي

- يرن جرس تليفون إبراهيم، ويرد

إبراهيم

تمام..

الليثي وصل يا بشا.. هروح استقبله

رفعت

ماشى يا هيمة، اسبقني وانا هحصلك.

قطع

طريقة قاعة الاحتفالات بالسجن

- يظهر محمود الليثي الممثل، وهو مندهش وكأنه تائه، ومذهول من سبب وجوده، أمامه العقيد إبراهيم، يسمع أصوات احتفالات وحركة في الطريقة

محمود الليثي

يا فندم، أنا مش معترض، أنا أصلا مقدرش أعترض..
أنا بس مش فاهم أنا بعمل أيه هنا

إبراهيم

أيه يا فنان. ز مالك خفيف كدة..
هتكون بتعمل إيه.. هتغني طبعا

محمود الليثي

أقسم بجلال الله أنا مبغيش.. أنا ممثل

إبراهيم

وبعدين بقا.. هتزعني منك.. ماهو التمثيل والغنا أيه.. ماهو
كله محصل بعض يا فنان.. اجمد كدة..

- ينظر الى عسكري ويشاورله ويأخذ منه المايك

هات اليكروفون يا حسين

امسك الحديدية وجلجل الدنيا يا فنان

- أداء كوميدي من الليثي وهو محتاس، وينظر خلفه فيجد عدد من الرتب العسكرية المهيبة،
فيأخذ المايك، ويتوجه للمسرح.

- يظهر رفعت واقفاً يتابع الحوار من على بعد، فيراه إبراهيم ويتوجه له بأداء المنجز

إبراهيم

مش بقولك فنان يا باشا.. أيه رأيك بقا.. عجبتك يا باشا؟

- يضحك رفعت وهو يدخل سيجارته، ويشير له بيده، علامة لايك، ويتركه.

منزل رفعت

الريسبشن

- سارة وسلوى تجلسان جلسة ودية على كنبه الانترنت.. وتشربان مجات النسكافيه..
- يبدو أنهما منسجمتان ف الحكي.. كأم وابنتها..
- سلوى بهزار وكأنها تستوجب سارة..

سلوى

يا بت غلبتيني.. هتحي ولا أخلي عمك يعلقك ويستجوبك؟..
وساعتها هتعرفي بكل حاجة..

- سارة متأففة من سيرة عمها.. ثم تسترجع حديثها الودي مع سلوى..

سارة

يادي السيرة النكد..

يا سوسو يا حبيبتي.. مفيش حاجة أصلا تتحي.. احنا يدوبك
لسة ف مرحلة النظرات، واللمزات.. والنحنحات.. أحكيلك أيه
والنبي؟..

سلوى

ياختااي.. لأ.. همزات ونظرات، يبقى على ما يتكلم هتكونوا
طلعتوا معاش.. سيبك م الهم ده..

سارة

ماهو يا سوسو احنا لسة عارفين بعض يدوبك من أسبوع ف
الشغل الجديد..

- يدخل رفعت فيتوقفان عن الكلام..

- رفعت مقطبا جبينه لرؤية سارة.. يتحدث باقتضاب..

رفعت

مساء الخير

سلوى

مساء النور حبيبي.. مكلمتنيش يعني وانت جاي

- رفعت غير عابيء بكلام سلوى وينظر لسارة..

- سارة تلتقط حقيبة يدها بسرعة وتتجه ناحية الباب..

سارة

طيب سلام أنا بقى.. هبقى أكلّمك يا سوسو..

- رفعت يجذبها من ذراعها لتواجهه ويحدثها بعتاب أبوي حاد..

رفعت

هو مفيش فائدة ف تصرفاتك دي؟

- يدفعها برفق لتجلس على الكرسي الذي خلفها..

رفعت

اترزعي هنا وكلميني عدل

- تجلس سارة محتضنة حقيبتها ومتحفزة..

سارة

نعم حضرتك عاوز تكلمني في إيه؟..

- رفعت محاولا السيطرة على صوته ليبدو هادئا..

رفعت

أمك قالتلي أنك لقيتي شغل وهتبتدي معاهم من أول الشهر...

أسم الشركة دي إيه ومين أصحابها؟..

- سارة بتحدي واستفزاز..

سارة

إيه هتتحري عنهم هم كمان؟..

- رفعت بانفعال أبوي..

رفعت

يا بنتي أفهمي.. أنا لازم أتطمئن عليك وعلى المكان اللي

هتكوني فيه...

- سارة تقف بسرعة منهية الحوار وتتجه ناحية الباب..

- تتحدث بعتاب وتحدي..

سارة

لا يا شيخ.. لا.. أتطمئن قوي يا عمي

- سارة تفتح الباب وتخرج وهي تكتُم دموعها...
- رفعت يطيل النظر نحو الباب وتظهر على وجهه ابتسامة وعينه تكاد تبكي..
- تقترب منه سلوى وتضع يدها على كتفه، وهي مندهشة من رد فعله..

سلوى

غريبة.. سيادة العميد مزعش وكسر الدنيا زي كل مرة
يعني..

- رفعت عينيه لأمعة، ووجهه مبتسم وفرح..

رفعت

أول مرة تقوللي عمي من 12 سنة يا سلوى

قطع

حجرة النحت في السجن

- شريف مندمج في عمل منحوتات رائعة تعطي شكل ملائكة أو مجسمات متداخلة لإنسان له أجنحة..

- يدخل عليه رفعت، وينظر إليه، وهو ينحت، دون انبهار كالعادة وكأنه غضبان..

حزين ويخاطب شريف بأبوة حقيقية تحمل من الحنية والاهتمام ما هو مغاير لطبيعته الحادة والقاسية بل تفيض بمحبة حقيقية..

رفعت:

شريف يابني.. صرفولك صابون كفاية، ولا محتاج تاني

شريف يومئ برأسه بالنفي

رفعت:

طيب ع العموم شوف لو عاوز خامات تانية حتى ابقى قوللي..
اه . هتقولي ازاى صحيح.. طيب شوف كدة وبرضو لو عاوز
متعملش الشغل ده ابقى فهمني.. انت هنا بتعمل حاجة بتحبها
مش بتتعاقب.. وف كل الأحوال أي منحوتة هتفذهها
هنستخدمها في تزويق وتزيين السجن..

- ينظر له بعطف ويهم بالخروج ثم يعود وبقليل من الغضب

رفعت:

يابني لازم تنطق عشان ده فيه مشاكل ليا أنا شخصيا..
مينفعش كدة، انا عارف ان معندكش امراض أو صدمة تمنعك
من الكلام.. وعرفت كمان انك خريج صيدلة وابن ناس.. أتكلم
ولو معايا أنا بس لو حبيت..

- برهة من الصمت...

رفعت

ع العموم.. أنا هحولك عيادة وبعد كدة هينقلوك على
المستشفى.. مينفعش تفضل هنا كل ده وانت ممتنع عن
الكلام..

- شريف صامت.. ثم يهم رفعت بالخروج ليوافقه صوت شريف...

شريف

انا بريء

مشاعر ملتبسة تحتل وجه رفعت ما بين الصدمة والارتياح، وكأنها انفراجة...

قطع

قاعة الزيارة ف السجن

- قاعة الزيارة ف السجن بها عدد من الطاولات عليهم عدد من المساجين مع ذويهم..
- عماد يجلس أمام شريف، بينما نادية شقيقته تجلس بجواره..
- شريف يكمل حوار مع نادية.. التي تنتظر له بحب بالغ وتطبطب عليه كل شوية..
- شريف صوته هادئ كملاحه.. لا ينفعل، وملاحه كما هي ثابتة..

شريف

انا معنديش حاجة أقولها يا نادية.. وانت اكر حد عارف اني
مش هعرف ادافع عن نفسي..

نادية

لازم تعرف يا شريف.. لازم تتكلم وتقول اللي يبرأك حتى لو
هيدن حد ثاني.. يا شريف أنا ماليش غيرك، وأمك كل يوم
حالتها بتتدهور..

- شريف لا يجد ما يقوله..

عماد

فكر يا شريف من فضلك، موقفنا وحش أوي ف القضية ولازم
تعمل حاجة..

مزج

مكتب رفعت في السجن

- ينتقل الحديث لمكتب رفعت الجالس على مكتبه وأمامه نادبة وعماد..

- رفعت وكأنه بيرد على جملة المشهد السابق..

رفعت

ماهو ده اللي خلاني أطلب أقابلكم لما عرفت انكم ف الزيارة

عماد

يا فندم، كتر خير حضرتك.. بس متأخذناش يعني.. احنا مش فاهمين فيه أيه.. يعني فيه مشكلة عاملها شريف هنا؟.. ولا أيه بالظبط؟..

- رفعت مقاطعا..

رفعت

لا لا لا.. وهو انا ناظر مدرسة وهستدعي ولي أمره يعني؟..

- بابتسامة..

وكويس انكوا فاهمتوني حكاية سكوته دي.. لما بيبقى متضايق أو مخنوق..

نادبة

أه.. دي عادته من وهو صغير..

بس برضو.. احنا مش فاهمين حاجة يا فندم

- بأداء أبوي يتسم بالحكمة..

رفعت

شوفوا يا ولاد.. انا طبعا عمري خلال خدمتي ما عملت كدة، ولا أني أقابل حد من أسر النزلاء أو حتى أحاول اتدخل في تفاصيل المحاكمة.. بس المرادي فيه إحساس مختلف.. يعني ببساطة أنا عاوز أساعد الولد ده، على قد مقدرتي طبعا.. مش عارف ليه مش قادر أشوفه مذنّب.. فيه حاجة بتحركني أني أحاول اساعده.. أقف جنبه.. مش عارف ليه.. طبعا من باب الإنسانية..

- نادية وكأنها ما صدقت وتستنجد به..

نادية

اه والله يا فندم.. شريف عمره ما أذى حد ولا يقدر.. شريف
أطيب قلب ف الدنيا.. وللأسف القضية اتعقدت وفيه شهود
ضده، واحنا مش عارفين نعمل إيه..

رفعت:

طب بالراحة كدة فهموني واحدة واحدة إيه آخر التطورات..
والمحامي قالكوا إيه..

قطع

شوارع القاهرة

سيارة عماد

- نادية وعماد يتحدثان اثناء رجوعهم من الزيارة ومقابلة العميد رفعت..

- عماد مندهشاً..

عماد

انا مش قادر اصدق.. بقى فيه مأمور سجن يبقى مهتم بمتهم
وعاوز يظهر براءته.. جديدة دي..

- نادية مندهشة ومتحمسة..

نادية:

انت سمعت هو قال أيه.. قالك مختلف..

الراجل ده بيحس ويفهم.. غير شكله خالص اللي بيبان أنه
عنيف ويخوف كدة.. هو حس بشريف، وشاف قد أيه هو
ملاك وبريء ومش ممكن يرتكب أي جريمة... مش قتل..
يا رب.. يا رب اعمل حاجة وطلعنا م الأزمة دي على خير..

قطع

بيت رفعت

البلكونة

- رفعت وسلوى ف البلكونة يحتسيان القهوة..

رفعت

يا سلوى افهمي.. من امتى بتعاطف انا مع مذنب.. هو مجرد إحساس.. انتي لو شوفتي الولد هتعرفي اللي بقوله.. وبعدين خديها قاعدة.. مفيش فنان بيبقى مجرم.. الفنان ممكن يغلط، لكن صعب يرتكب جريمة.. ده غير انه ولد متفوق وخريج صيدلة.. يعني مش عيل برشمجي ولا بلطجي..

سلوى

الولد ده عنده كام سنة؟

رفعت

هو مواليد 12 يونيو 1997.. يعني 26 سنة دلوقتي

سلوى

واضح انك مش متعاطف معاه خالص.. دانت حافظ تاريخ ميلاده يا راجل..

- يخفت صوتها قليلا وهي تكمل..

احنا لو ربنا كان رزقنا بطفل كان زمانه قده دلوقتي.. مش كدة؟..

- يصمت رفعت ويسرح وكأنه يداري إحساس بداخله....

قطع

مكتب رفعت في السجن

- رفعت على مكتبه يتحدث ف التليفون..

- صوت أم كلثوم ف الخلفية..

رفعت

حبيبي يا ناجي.. انا لما عرفت انك ظابط التحريات للقضية دي.. قولت اجيب م الآخر واكلمك ع طول.. اهو منها أسمع صوتك وأفكرك باللي عليك..

- يصمت برهة ويضحك..

يا راجل.. دانت يوميه اتقفشت ف الميز وانت بتسرق اللحمه وخذت حبس خميس وجمعة والصول محمد الصعيدي كدرك، ولولايا كان علم عليك.. أيام يا ناجي..

- يضحك..

بص يا ناجي.. الولد ده يهمني، وانا قريرت المحاضر والتحريات وشهادات الاثبات، وكل التفاصيل.. بس بصراحة حبيت اسمع منك.. عاوز اعرف انطباعك انت..

- صمت وهو يستمع باهتمام لبرهة، ويمى برأسه.. وف النهاية يبدو عليه أنه تأكد من احساسه..

- يرد على سؤال..

رفعت

لا لا خالص.. لو يقربلي هقولك.. هو فضول بصراحة.. وزى ما تقول جالي نفس الإحساس اللي جالك.. فقولت أتكلمك واكلمك..

حبيبي..

- يغلق السماعة ويمعن النظر في منحوتة قلعة السجن التي أبدعها شريف..

مزج

حجرة النحت في السجن

- شريف مندمج في عمل تمثال لإمرأة (أشبه بامرأة تمثال نهضة مصر الشهير للمثال محمود مختار.. ويبدو عليها رمزية (مصر)..
- تظهر الخامات المستخدمة مختلفة عن الصابون.. (طين أسواني أو صلصال)..
- يدخل عليه رفعت.. ينظر إليه لفترة وهو مبتسم ومنبهز ومتعاطف..
- شريف لا يشعر به حيث يرتدي سماعة في أذنه... الى أن ينتبه ويخلع السماعة من أذنيه..

رفعت

شريف.. أنا مصدقك يا بني

شريف يبتسم بامتنان وهو ينظر له.. ثم يعاود عمله في نحت التمثال..

قطع

مكتب رفعت في السجن

رفعت يتحدث ف التليفون بجدية واهتمام..

رفعت

يا يحيى دي مش قضية ورث ولا صحة توقيع.. دي جريمة
قتل.. ومعقدة ومقفولة.. وانا قولت مفيش غير يحيى التهامي
هو اللي هيعرف يفك شفرتها..

لا يا سيدي مش حد من عيلتي.. بس عاوزك برضو تتعامل
مع القضية كأنها بتاعتي وكأني انا المتهم..

سيبك من التفاصيل دي وهنبقى نحكي بعدين.. انا هخلي اخته
تعملك توكيل، وهتجيبك هي وصديقه وتجييبك محاضر القضية
والضبطيات والجلسات وكل حاجة.. مش هوصيك يا يحيى..

- برهة سكوت..

- ثم باهتمام ورجاء..

يا يحيى .. الولد ده بريء.. اتصرف..

قطع

مكتب يحيى المحامي

- مكتب محاماه فخم يتسق مع كونه من كبار محامين البلد.. يحيى رجل ستيني أشيب ويبدو عليه وقار ودهاء المحامين الكبار..

- يحيى يتحدث ف التليفون مكملًا مكالمة المشهد السابق.. بدعابة..

يحيى

يعني هو انت لما تقوللي الولد ده بريء يا يحيى.. اقولك
أمرك يا مولاي وركبي هتخبط في بعض.. يا جدع سيبني
أدرس القضية وأفهم ايه الدنيا وبعديها اقولك ان كان بريء
ولا لأ.. هشوف ايه الدنيا وهبلغك..

خير يا حبيبي باذن الله...

قطع

مكتب رفعت في السجن

- رفعت يكمل حديثه مع المحامي ف التليفون..

- يتحدث بجدية واهتمام وأداء سريع..

رفعت

لا يا سيادة المستشار.. انا مش باعتلك القضية عشان تقوللي

ان كان بريء ولا مش بريء.. انا باعتها لك عشان تقوللي

هتعرف تطلعها منها ولا مش هتعرف.. سلام يا متر..

- علامات القلق ترتسم على وجهه..

قطع

منزل رفعت

- سلوى وسارة يجلسان ف غرفة المعيشة بالمنزل بأريحية صديقتين

سارة

مش فاهمة قصدك أيه.. يعني عاوزة تقولي ان العميد رفعت
الكومي.. هذا الهرقل.. قلبه يهتز ويرتجف ويتعاطف مع
مجرم متهم بجريمة قتل.. يعني الموكوس الحنين ماتعاطفش
مع اخوه وبنت اخوه ورايح يتعاطف مع مجرم..

- سلوى تضحك، وتضرب سارة على يدها بعتاب محب..

سلوى

اتلمي يا بنت.. ده عمك

سارة

عمي منين وازاي يعني.. بس تصدقي صح.. ماهو اللي زي
ده ميتعاطفش غير مع الأشرار اللي زيه..

سلوى

وبعدين معاكي بقا.. طب انا غلطانة اني بحكيك

- سارة وكأنها تعترف باحساس داخلي..

سارة

تصدقي اني ساعات بيجيلي لحظات كدة.. لحظات.. احسن ان
رفعت ده مش وحش اوي كدة.. عارفة امتى..

سلوى

امتى

سارة

لما بشوف عشقه الغريب للفن والجمال.. والأكثر لما بلاقيكي
بتدافعي عنه بحب وهيام كدة.. بقول مش ممكن سوسو
الكيوتة دي هتتحب وتعيش مع واحد شرير أوي كدة..

سلوى

شرير تاني.. راجعي نفسك يا سارة ف علاقتك بعمك دي..
مفيش إنسان كله شر أو كله خير.. عمك جايز مش بيعرف
يعبر عن مشاعره صح.. أو حتى يحب صح.. لكن ده
مينفיש أنه بيحب وبيحزن ويتألم ويحتاج.. حاولي تقربي
منه وتفهميه.. شوفيه من جواه.. لما تشوفي قلبه أكيد
هتغيري رأيك.. متضيعيش سنين اكتر م اللي ضاعت.. انتوا
الاتنين محتاجين بعض اوي... زي مانا محتاجالكوا أنتوا
الاتنين أوي...

- سلوى عينيها تلمع وعلى وشك البكاء..

- سارة تحاول تغيير الموضوع..

سارة

ما علينا.. طب ممكن بقا تفهميني اشمعنى البيه بتاعك تعاطف
وتحنن ع الواد ده دون المساجين اللي طول عمره عايش
معاهم..

سلوى

أه منك أنت أه

قطع

مكتب رفعت في السجن

- رفعت يجلس على كرسي الضيف في مكتبه وأمامه شريف، وعلى المنضدة بينهما صينية عليها كوبان شاي بلبن.. وصوت أم كلثوم في الخلفية.. والأجواء ليلية..
- شريف يبدو عليه السكينة والراحة وابتسامة خفيفة تعلو وجهه طول الوقت..

رفعت

انا معرفش.. متسألنيش مهتم ومش مهتم.. معرفش.. بس كل اللي اعرفه ان انا مبعملش أي تصرف ضد القانون أو ضد ربنا.. بالعكس.. لو انا قدرت أثبت حقيقة وحققت العدل بأني أنقذ بريء.. يبقى ده هو القانون بعينه..

انت عارف قانون يعني أيه؟

شريف

يعني.. تقريبا.. القانون هو القواعد اللي بتنظم..

- رفعت مقاطعًا شريف..

رفعت

مش قصدي تعريفه.. قصدي كلمة قانون..

- شريف يومئ بالنفي..

رفعت:

قانون كلمة يونانية معناها العصا المستقيمة.. والمقصود من العصاية هنا مش العصاية بتاعة الأمن المركزي اللي بيلسوعوا بيها العيال بتوع الشغب لأ.. المقصود بيها الاستقامة.. بمعنى قياس مدى إحترام الأفراد لما تنص عليه القاعدة القانونية، فإذا ساروا وفقا لمقتضياتها كان سلوكهم مستقيما، وإن تمردوا عنها كان سلوكهم منحرفا.. يعني مش مستقيم زي العصاية.. ده المعني الأصلي لكلمة قانون.. الهدف العام بقا من القانون أيه.. تحقيق العدل..

يعني لو انا هساعد ف انا اطلع سيادتك براءة لأنك مش مذنب.. يبقى أنا عملت الهدف الأسمى والأعلى والأشمل والأهم لتطبيق القانون.. واللي اتوجدت من أجله القوانين.. اللي هو العدل..

- شريف بإعجاب..

شريف

سيادتك فنان

- رفعت مندهشاً..

رفعت

فنان؟.. انا عمال اكلمك ع القانون وتطبيقه ومصدر الكلمة
ومجرم ومذنب.. وتقوللي فنان.. ايه اللي خلك تقول كدة يا
عم الفكيك انت؟

شريف

سيادتك بتشرح معنى واهمية القانون بروح فنان.. مش بروح
نائب مأمور سجن.. لأن ببساطة لو سألت أي حد من السادة
الظباط.. هيقولك التعريف اللي درسوه في كلية الشرطة،
ومش بعيد يحطه بين قوسين كمان..

- رفعت ضاحكاً ومندهشاً..

رفعت:

الله.. انت بتهذر يا شريف؟.. دانت داخل على أربع شهور
أهو هنا ومشفناش شكل سنائك يا جدع.. ده غير صوتك اللي
لسة مشرفنا من كام يوم..

- رفعت ضاحكاً وشريف مبتسماً..

رفعت

شوف.. ماهي حكاية فنان دي اللي زي ما تقول كدة بوظنتلي
حياتي.. انا من عيلة أصغر رتبة فيها عمي جودت الله يرحمه
عشان مات ف حادثة بعد ما اتخرج بأسبوعين.. يعني كان
لسة ملازم.. العيلة كلها ظباط.. وانا اتعاملت من وانا ف
المدرسة الابتدائي على اني ظابط صغير.. اه والله.. ابويا
سيادة اللواء حسين عبد الرحيم الكومي، كان بيناديلي ف
البيت برتبتي العسكرية حسب المدرسة.. يعني ف ابتدائي
كنت دفعة ومستجد ومجدد وصول وشاويش.. دخلت اعدادي
بقيت ملازم، وملازم أول ونقيب.. كان بيرقيني كل سنة خدمة
ف المدرسة، لحد ما علقت لواء وانا ف ثانوية عامة.. أنا
قولت كفاية كدة لحسن الرتب بتخلص...

- رفعت يضحك من قلبه وشريف مبتسمًا..

شريف

وده بالنسبة لطفل بيحب الفن بيبقى عامل ازاي؟

رفعت

بيبقى عامل التركيبه اللي انت شوفتها واللي أكيد مكنتش
طايقها من يوم ما شرفت هنا..

انا عاوز أقولك ان انا بلا فخر، احسن عازف جيتار ممكن
تسمعه ف حياتك.. دانا كان عندي حته باند، مش هتصدق لما
تعرف زمايلي ف الباند ده بقوا أيه دلوقتي...

طبعاً كل ده ف الخفاااء من ورا سيادة اللواء..

سيبك م الهري ده.. انت متعرفش فرقت معايا قد ايه انك
بتحب الشاي بلبن.. دي بالنسبالي أعظم مؤشر لحجم
موهبتك..

- يضحك بصوت عالي..

- شريف يندمج ف الحديث ووجهه وأداؤه مرتاح..

شريف

لا ان كان على كدة بقااا.. انا عاوز أقول لحضرتك ان ابويا
كان هيطلق امي بسبب حبي للشاي بلبن.. من كتر مانا
بخلصهم أكياس اللبن اللي كان بيحبها.. ده بقى يخبيه
لحد ما ييوظ.. مش عارف ليه إتعامل مع الشاي بلبن كأنه
حشيش.. كان ناقص يدخلني مصحة ادمان شاي بلبن..

- رفعت يضحك ويبدو عليه السعادة..

رفعت

ان جيت للحق هو ادمان فعلاً.. ده بيبقى ف الدم بجد ولازم
يتسحب..

- شريف يبتسم وكأنه نفسه يضحك..

رفعت

طب قوللي انت بقا.. ايه اللي جاب الصيدلة للنحت والرسم؟
.. ايه حكايته..

شريف

مفيش .. تقدر تقول نفس ظروف سيادتك .. مع الفارق طبعاً ..
يعني والدي شجعني اوي وانا صغير اول ما اكتشف فيا
موهبة الرسم .. وكان بيوديني معارض ونروح لرسامين،
ويجيبي أي أدوات احتاجها .. كان فرحان وفخور بيا أوي ..

رفعت

فرحان بيبك ونفس ظروفي..! ازاي يا جهيز؟

شريف

عشان أول ما نجحت ف ثانوية عامة وجيبت مجموع .. صمم
يدخلني صيدلة .. ولا كأي عندي موهبة أو في مشروع فنان
جوايا ..

رفعت

يا راجل .. يعني هو دلحك وانت صغير وغدر بيبك وانت كبير ..

- شريف وهو مبتسم ..

شريف

حاجة زي كدة

- رفعت يعطي شريف موبايله ..

رفعت

طب افتحلي الأكاونت بتاعك .. أو صفحتك اللي فيها شغلك ..
بتسموها أيه؟ ..

شريف

بيهانس

أيوة بيهانس دي ..

على ما نعمل دور شاي بلبن تاني ..

مزج

حجرة النحت في السجن

- وكأنه استمرار لحوار المشهد السابق..
- شريف يجلس على كرسي بين يديه أوراق رسم وقلم رصاص، ويرسم به خطوط غير واضحة.. ويظهر ف الخلفية تماثيل منحوتة لنجيب محفوظ وام كلثوم وسعد زغلول..
- ف الخلفية صوت اسمهان تغني "ليالي الأنس ف فيينا"..
- رفعت يصب لبن ف أكواب الشاي ويتحدث وهو يقلب..

رفعت

انت على كدة اسمهاني ولا كلثومي؟..

شريف:

تقدر تقول فيروزي أكثر..

رفعت

يا راجل.. فيروز دي عظمة.. ربنا يديها الصحة

شريف

وحضرتك؟

رفعت

انا يا سيدي تقدر تقول كلثومي فيروزي اسمهاني نجاتي
فيزاوي اطرشاوي عبوهاياوي حليماوي شادياوي.. ليلي
مرادي..

مفيش خامه حلوة محبتهاش.. غالبا معنديش ميول قد ما
عندي استمتاع بكل ما هو جميل..

- رفعت بطريقة..

بس طبعا كل دول كوم وبيكا كوم ثاني.. ده ف القلب من
جوة..

- رفعت يضحك بشدة، ويكمل حديثه باستمتاع..

طب أقولك بقا مين ثاني اللي بيسلطني .. مش هتصدق..

- شريف يومئ برأسه للسؤال..

رفعت

سُمعة.. إسماعيل يس.. تخيل ببقا ف قمة اندماجي وانا بسمع
مونولوجاته..

- رفعت يدندن المونولوج بانتشاء..

متستعجبشي.. متستغربشي... فيه ناس.....

- شريف مؤكداً على كلام رفعت..

شريف

سُمعة ده حكاية.. حضرتك عارف ان إسماعيل يس المفروض
يدخل موسوعة جينيس.. لأنه اكثر فنان اتعمل أفلام باسمه..
اكثر من 17 فيلم..

- رفعت سعيد ومندهش..

رفعت

يا بن اللذين يا شريف.. صح.. ده غير أنه عمل أكثر من 260
فيلم، غير اللي ضاعوا ومش موجودين..

شريف

طب تعرف مين اللي لحن المونولوج ده..

إسماعيل يس نفسه..

- رفعت سعيد وكأنه غير مصدق أن يجد شخص له نفس اهتماماته.. ينظر إليه ويسرح ثم
يتدارك ويعاود الحديث..

رفعت

أنا سعيد ببك يا شريف.. بجد سعيد بصدافتك.. وسعيد أنني
لقيت حد فنان ومتذوق للفن كدة..

- شريف وهو يرتشف الشاي بلبن..

شريف

ماهو الفنان لازم يكون بيعرف يتذوق قبل ما يعرف يبديع

رفعت:

طبعا.. عشان كدة احنا مختلفين دايما وصعب الناس تفهمنا...
معدورين..

شريف:

صح.. تحس كدة ان رب الكون ميزنا بميزة..

- رفعت يضحك..

رفعت

شوفت أهو حمو بيكا الغائب الحاضر

- رفعت يضحك، وشريف بيتسم، ثم يكمل الحوار..

شريف

طب دول المطربين.. الممثلين بقا؟

رفعت

لا الممثلين بقا متعديش.. بس تلاقيني كدة ابيض واسود
حبتين.. يعني بما اني عجوز ومن دور والدك كدة.. تقدر
تقول اني من عشاق السينما من يوم مولدها.. الريحاني بقا
على صدقي على الكسار على فاطمة رشدي على يوسف بيه..
انت أكيد متعرفش انا بتكلم على مين.. دانت حباله عشريناتي

شريف

ماهو الميول دي مش بالسسن زي ما اتفقنا.. طب سيادتك
تعرف ايه هو أول فيلم ف السينما المصرية؟

رفعت

انت تعرف؟

شريف

طبعا

رفعت

لا دانت جيتلي بقا.. لازم تزورني بعد ما تخرج بالسلامة وانا
هفرجك على كنوووووز.. ولا أقولك استناني دقيقة...

- يخرج رفعت مسرعاً من الحجرة...

مزج

حجرة النحت في السجن

- استمرار للمشهد السابق

- يدخل رفعت مرة أخرى ممسكًا بنوتة مذكرات يوسف بيه وهبي، الذي أحضرها من مكتبه، ويعطيها لشريف..

رفعت

قوللي أيه رايك ف دي؟

- شريف يأخذ النوت ويقلب فيها..

- ويبدو عليه الاندهاش..

شريف

الله.. دي مذكرات يوسف بيه وهبي الأصلية.. دي جيبته
ازاي دي يا فندم؟.. دي كنز.. انا قرئت كل اللي فيها على
فكرة.. كانت روزاليوسف نشرته ف عدد قديم ...

رفعت:

يابن اللذينا.. دانت حكاية..

شريف

سيادتك اللي حكاية يا فندم

- شريف يبتسم وهو محرج..

- رفعت ينظر اليه بعطف وحب شديد..

قطع

مكتب رفعت في السجن

- رفعت يتحدث ف التليفون، ويبدو عليه الانفعال..

رفعت

هو أيه اللي صعب يا يحيى.. امال انا جايلك ليه.. اتصرف..
دور بقا ف ثغرات الضبطية.. ف شهادة شهود الاثبات، شوف
مين شارى العيال دي وإيه مصلحته يلبسها للمسكين ده.. انا
يعني اللي هقولك تعمل أيه...

- لحظات صمت..

يوسف ده الواد زميله اللي اختفى بعد الحادثة؟... طب وده لو
وصلناله هيبقى فيه أمل يعني؟... طب دور وانا من ناحيتي
هعمل اللي أقدر عليه.. بس خصيمك النبي تسخن شوية.. دي
الجلسة كمان أسبوع..

قطع

أمام دار القضاء

- خروج رفعت مع يحيى المحامي وخلفهما عماد ونادية وصديقتها..
- رفعت ويحيى يتحدثان أثناء السير ويتوقفان أمام مدخل دار القضاء..
- يبدو عليهم جميعاً الضيق وبخاصة رفعت..
- رفعت يتحدث بانفعال وحدة..

رفعت

أيه يا يحيى اللي بيحصل ده.. القضية اتحجرت للحكم،
ومفيش أي حاجة جديدة، يعني الواد كدة هياخد اعدام..

يحيى

يا رفعت يا حبيبي أصبر.. ان الله مع الصابرين.. انت عارف
ان القضية مقفولة، ومفيش أي ثغرة ممكن تعمل حاجة...

نادية

طب ويوسف ؟

يحيى

المحكمة مهتمتش باختفائه طالما فيه شهود اثبات

عماد

طب والحل

يحيى

الحل الوحيد مش ظهور يوسف.. الحل ظهوره ومعه دليل
براءة شريف، سواء دليل واضح مقتع لهيئة المحكمة، او
يكون هو المجرم، ونعرف نثبت ده، لأن ده المبرر الوحيد
لاختفائه المفاجيء..

- نادية تصدم وتسرح ف الجملة..

نادية

معقولة.. يوسف.. يكون هو المجرم

رفعت

يعني عاوز تقول ان أهم حاجة قدامنا دلوقتي نوصل لـيوسف..
لعل وعسى ظهوره يغير حاجة.. صح؟

يحيى

بخبرتي أقدر أقولك أن زتونة القضية دي ف ظهور الولد
الهربان ده.. إما اثبات التهمة على شريف أو برائته منها.

- رفعت ينظر للأمام بنظرة شرود مفهومها انه لازم يتصرف بسرعة..

قطع

شوارع القاهرة

سيارة عماد

- عماد يقود السيارة ويتحدث مع نادبة التي يبدو حزنها وسرحانها وأنها غير مصدقة..

- عماد وكأنه متردد ف الكلام، ثم يتماسك ويتحدث..

عماد

نادبة.. دلوقتي أملنا الوحيد ف ظهور يوسف.. انا بصراحة
عارف انكوا كان فيه حاجة بينكم..

- نادبة تتفاجأ وترتبك..

عماد

أنا آسف.. عارف ان مش من حقي.. بس ده مش وقته..
شريف هو اللي حكالي كل حاجة.. وعلى فكرة هو كان فرحان
ونفسه يفرح بيكوا.. مكانش يعرف القدر شايله ايه..

- نادبة صامته وتبكي بحرقة..

عماد

متزعزعيش مني يا نادبة.. بس أكيد انتي ممكن يكون عندك أي
فكرة توصلنا ليوسف.. أي أكاونت قديم أو رقم .. أي حاجة...

- نادبة ترد غاضبة، وتتحدث بعصبية..

نادبة

انت اتجننت يا عماد.. انت تفكر ان معايا أي خيط لبراءة
اخويا ومخبياها؟.. انت بتقول ايه...

قطع

مكتب رفعت في السجن

- شريف يجلس أمام رفعت في مكتبه.. يمسك أوراق يرسم فيها بالرصاص.
- أمامهما الـ شاي بلبن..
- رفعت يتحدث وهو منشغل بأشغال سيجارته..

رفعت

أقولك بقا على أغرب حاجة.. انت عارف ان أبويا مات وانا
ف ثانوية عامة.. يعني لما جيت أقدم ف الكلية كان ممكن
أدخل أي كلية غير الشرطة.. بس مقدرتش..

شريف يهز رأسه بالاستفهام

- رفعت وكأنه يحدث نفسه..

رفعت

معرفش.. خوفت، ومش عارف خوفت من أيه بالظبط.. ممكن
من الخروج عن الخطة أو التراك اللي مرسوم.. أو جايز من
باب أني أرضيه حتى بعد موته.. حقيقي معرفش سبب معين،
معرفش غير انها كدة ولازم تكمل كدة ومينفعش أعمل غير
كدة..

- ينتبه لشريف وهو يرسم..

رفعت

وريني بتشخبط ف أيه..

- يأخذ الورق من شريف ليتبين أنه يرسمه كاريكاتير كروكي بالرصاص..
- يندهش رفعت ويضحك ويرفع الصورة بيده وكأنه هيعلقها ع الحائط..

مزج

مكتب رفعت ف البيت

- يمزج بالمشهد السابق ليعلق رفعت الصورة الكاريكاتورية على الحائط بين عدة صور مرسومة له كاريكاتير بتوقيع مشاهير الفنانين مثل جورج البهجوري ومصطفى حسين وتوقيعات أجنبية..

قطع

بيت رفعت

- سارة تساعد سلوى في ترتيب المنزل.. وترى الأعمال الفنية لشريف التي زين بها رفعت حائط وأرفف مكتبته في حجرة مكتبه بالمنزل..

سارة

الولد ده فنان بجد يا سوسو... خسارته في السجن والله..

- سلوى وهي تكمل ترتيب الغرفة..

سلوى

عمك مهووس به

- سارة بسخرية..

سارة

ده الغريب... مش قادرة أتخيل أن سيادته ممكن يبقى فيه أي علاقة من أي نوع بينه وبين مسجون غير التكدير والتعليق..

- يدخل رفعت مرتديا بيجاما وواضح أنه كان نائما وفي دخوله سمع جملة سارة الأخيرة..

- يقف خلفها دون أن تشعر به..

رفعت

أه يا ستي ... ممكن قوي...

- تعتدل سلوى وتلتفت لرفعت..

سلوى

إيه اللي صحاك؟.. أنت مش قلت أنك تعبنا والنهارده هتصحى براحتك.. دي الساعة مجتش 9... على العموم صباح الفل..

- تطبع قبلة سريعة على خده..

سلوى

هعملك الشاي بلبن واجهز لك الفطار بسرعة... تعالى معايا يا سارة..

- رفعت بتريقة..

رفعت

ايه انت خايقة تسببها معايا لوحدا... ماتخافيش أنا بطلت
أكل لحوم البشر من زمان..

- رفعت موجه حديثه لسارة..

رفعت

واقفة ساكتة يعني ولا ناوية تجري كعادتك؟..

- سارة تحاول الهروب من رفعت..

سارة

أنا هساعد سوسو في تحضير الفطار..

- رفعت يجذبها إليه برفق..

رفعت

لا هي شاطرة وهتعرف تحضره لوحدها...

- يسألها باهتمام واضح

عاملة إيه في شغلك

سارة

سيبته

- رفعت باندهاش وقلق..

رفعت

ليه؟ حد ضايقك؟... يا بنتي فهميني..

سارة

لأ... حسيت أنه مش مناسب ليّ ومش مبسوطة.. سبته..

رفعت

يا بختك يا سرسور

- سارة مندهشة من الجملة..

سارة

يا بختي.. على أيه يا حسرة؟

رفعت

ماهو اللي متعجبوش حاجة ويسيبها براحتة أوي كدة.. يبقى
يا بخته ونص..

بصي يا سارة... لازم تحددي أنت عاوزة إيه... لازم تعرفي
كويس عاوزة تكلمي حياتك بتعملي إيه... الحاجة اللي بتحبيبها
وتستمتعي بها أمسكي فيها بأيدك وسنانك... ولا يهمك كلام
الناس ولا كلام أمك.. ولا أي حد... الحياة يا بنتي رحلة يا
تعرفي تستمتعي بها يا تعيشي عمرك كله تتعذبي وتلغنيها..

- يقترب منها وينخفض صوته قليلا..

ما تعمليش زي.. أنا بعترف أنني غلطت لما قررت أعيش في
بدلة أبويا... واتقمص شخصيته مع أخويا الصغير ومن قبله
مع نفسي... بس دفعت الثمن غالي قوي... ومش عاوزك
تكرري الغلطة دي... أرجوكي..

- يضع يده على كتفها..

ما تحوليش ترضي غير نفسك... عمرك لسه قدامك أشتريه
حتى لو هتبيعي الكل..

- تنظر سارة ليده الموضوعه على كتفها وتنقل بصرها لتري شبح دمعة حائرة
بعينه ولأول مرة ترى الجانب الخفي لشخصية العميد رفعت..

- لقطة لسلوى واقفة من بعيد تبسم وتبكي في هدوء..

قطع

فوتومونتاج

- لقطة مكبرة لدار القضاء مع صوت القاضي دون ظهور الجلسة..
- لقطات لـ رفعت في مكتبه وهو مرتبك ويبدو عليه القلق
- رفعت يمسك التليفون الذي يشير الى أنه يتلقى خبر الحكم..
- مع لقطات لبكاء نادية وعماد..
- مع لقطات لعربة الترحيلات التي يستقلها شريف الى محبسه..
- مع لقطات لاستلام شريف البدلة الحمراء..
- التأكيد على هدوء شريف وعدم تأثره..
- كل هذا مع صوت النطق بالحكم..

ص. حاجب الجلسة

محكمة

ص. القاضي

بعد الاطلاع على محاضر الجلسة والمرافعات وشهادة شهود
الاثبات، ومحاضر التحقيقات.. استقر يقين المحكمة على
ارتكاب المتهم شريف لجريمة القتل العمد، مع سبق الإصرار
والترصد..

ولهذا قررت المحكمة باجماع الآراء الحكم على المتهم شريف
عبدالله حسين البنهاوي، وشهرته شريف البنهاوي.. بتحويل
أوراقه الى فضيلة المفتي.. رفعت الجلسة..

- صوت صرخ..

ص. الحاجب:

محكمة

- يقع الموبايل من يد رفعت وهو ف مكتبه، فور النطق بالحكم، ويضع يده على وجهه معبراً
عن حزنه البالغ وقلة حيلته..

قطع

مكتب يحيى المحامي

- رفعت و عماد يجلسان في مكتب المحامي..

يحيى

انت هتصغرنا ولا أيه يا سيادة العميد.. فريق محامين ايه اللي
عاوز توكله.. انا ف مكتبي أكبر فريق محامين ف البلد.. هي
أيه.. بالراس؟..

وبعدين لسة ف..يه نقض ودرجة ثانية ومعانا وقت.. بس
مش هي دي المشكلة..

- رفعت منفعل..

رفعت

يا يحي الواد خد إعدام..هستنى أيه تاني.. واحنا كدة واقفين
محللك سر.. مفيش أي خطوة واللي جاي صعب أوي..

- يحيى بأداء قلة الحيلة..

يحيى

انت محسسنى ليه ان انا مقصر.. انا والناس بتوعي بنعمل
كل اللي ممكن نتخيله.. انا مش لازم اقولك تفاصيل يا سيدي..
بس فعلا الموضوع صعب.. الضمنة قفلت، وملهاش مخرج..
وانت عارف لو فيه أي حاجة تتعمل انا مش هتأخر..

شوفولنا الواد الهربان ده .. جايز يكون آخر أمل..

- عماد باندفاع وحماس..

عماد

انا هعمل المستحيل عشان الاقي يوسف.. هسافر الغردقة
أدور عليه..ولو حصلت، هلف البلد كلها..

- رفعت بأداء مُحَبَّط..

رفعت

ده لو لسة جوه البلد أصلا..

قطع

مكتب رفعت ف السجن

- رفعت يتحدث ف التليفون ويقلب أمامه على المكتب ملف عليه اسم يوسف، وعدة صور له مختلفة (الظهور الأول لوجه يوسف) ..

- رفعت يتحدث باهتمام ويكاد يكون متوسلا ..

رفعت:

ناجي.. دي خدمة لأخوك.. انا عارف انك مش هتقصر رقبتي.. وبرضو عشان تكون عارف.. انا كلمت رفيق وماجد.. ومحمد عويس انا عارف انه بيخدم ف الغردقة.. صور الواد وملفه كله عندك ع الواتس.. انا طبعا اتأكدت ان الواد مخرجش برة مصر.. ع الأقل بشكل قانوني.. عاوز الواد ده يظهر بأي طريقة يا ناجي.. ماهو المحكمة مقررتش بإدراجه ع المطلوبين ولا الوزارة عملت نشرة.. هو بالنسبة للمحكمة مجرد شاهد غير مؤثر في مجرى القضية.. ولم يستدل على عنوانه..

بس بالنسبالي هو نهاية القضية دي.. هاته انت بس وهنعرف منطقة..

قطع

بيت رفعت

البلكونة

- رفعت يقف سرحان ويبدو عليه الضيق الشديد.. يدخل سيجارة ويرتدي بيجامة حمراء..
- تدخل عليه سلوى، ويبدو عليها القلق عليه..

سلوى

وبعدين يا رفعت.. انا خايفة عليك أوي.. وخايفة أوي م اللي
جاي..

رفعت

متخافيش يا حبيبتي.. خليها على ربنا

- سلوى تنتبه للبيجامة وتكمل..

سلوى

غريبة.. انت ليه لابس البيجامة دي؟.. مع انك طول عمرك
مبتحبهاش..

- رفعت ينظر للبيجامة ويحاول التبرير (بعصبية)..

رفعت

لا ولا حاجة.. اللي طلعت ف أيدي، وانا ف ايه ولا ف ايه يا
سلوى.. هو انا هركز ف اللبس والبيجامات دلوقتي..

- سلوى تحضنه من ذراعه وتطبطب عليه..

قطع

بيت شريف

- عماد ونادية وام شريف في غرفة نوم الأم، ويبدو عليها الإعياء الشديد..

- أم شريف تبكي وتتحدث بصعوبة..

أم شريف

انتو ليه يا ولاد مش عاوزين تفهموني.. عاوزة اعرف
هشوف ابني هنا تاني.. ولا هشوفه فوق؟، ومين هيسبق
التاني..

عماد

بعد الشر عليك يا حبيبتي..

- نادية تبكي بحرقة..

نادية

يا ماما انا هموت كدة.. انا خلاص مش قادرة.. صدقيني كل
حاجة كويسة وانشاءالله هتشوفيه قريب.. المحامين شغالين
والعميد رفعت مش ساكت.. ادعيله بس يا حبيبتي..

- تقبل يد أمها وتبكي عليها..

قطع

مكتب رفعت في السجن

- عسكري الحراسة يُدخل شريف ويخرج.. شريف مرتديًا البدلة الحمراء، يحمل في يده لوحة صغيرة.. رفعت جالس على مكتبه
- ينتبه رفعت الى البدلة وينظر له بأسى ثم ينظر في الأرض وكأنه يشعر بتقصيره تجاهه
- بينما أداء شريف لا يتغير، نفس الهدوء والصوت الواطي، وقلة التعبيرات، ولا يبدو عليه حزن، وكأن لا شيء جديد في الأمر
- رفعت يقف.. ويجلس على الكرسي أمام المكتب..
- يتحدث بأسى وحزن بالغ..

رفعت

تعالى يا شريف

- شريف يجلس أمامه، وينظر اليه بابتسامه لتهدئته..

رفعت

انا فعلا مش لاقى كلام أقوله.. بس خلىنا ف الأول...

- شريف مقاطعًا بابتسامه..

شريف

خلىنا ف الأول نشوف المفاجأة دي..

- يفرد اللوحة ف اتجاه رفعت لتظهر رسمة بها رفعت وشريف.. حيث يظهر رفعت وكأن حجمه أكبر من الطبيعي، وشريف حجمه أشبه بالأطفال، وكأنها صور أب وابنه..
- رفعت ينظر للوحة بفرح وحزن في آن واحد.. يمسكها ويمعن النظر فيها.. عينيه تلمع بالدموع.. ثم يتمالك نفسه..

رفعت

شريف.. اوعى تفكر انى ممكن اتخلى عنك.. انا هعمل المستحيل عشان تاخد حقك، وعلى فكرة دي مش أول مرة زى ما كنت فاكرك.. كان فيه قبل كدة مذنب.. مسجون يعني.. كان صعبان عليا.. مش عشان بريء، لأ.. عشان غلبان ومش وش مسجون.. كنت بساعد المحامي بتاعه وبعته للناس حبايبي يساعده، لحد ما عقوبته اتخففت، وربنا قدرني ولقيتله شغل كمان بعد ما خرج.. يعني انا طيب من زمان ومكنتش عارف اهو

- يقولها بابتسامة حزينة، ويرد شريف الابتسامة، ويتحدث بسلام داخلي غريب..

شريف

انا كل اللي طالبه من سيادتك انك متزعش.. انا سايبها على ربنا.. وزى ما يريد هيحصل.. هو انا برة السجن يعني هبقى ضامن اني مش هموت؟.. إرادة ربنا هتتحقق ف كل الأحوال، وده ف حد ذاته قمة العدل..

رفعت

طب وحقك

شريف

حقى ده مالهوش معنى وانا مش موجود.. الحقوق دي للناس اللي عايشة بتنهش ف بعض.. اللي ماتوا ليهم حسابات تانية.. وموضوع الظلم ده بقا قضية ربنا سبحانه وتعالى.. مش قضيتي انا.

رفعت

انت بتتكلم وكأنها خلصت ليه يابني.. لسة بدري وانا بوعدك اني مش هتخلى عنك مهما حصل.. وبعدين انت ليه بتحور وتهرب لما افتح كلام القضية ومش عاوز تتكلم.. يابني لو فيه حاجة انت عارف انها تبرأك لازم تتكلم، حتى لو هتدين حد بتحبه.. قوللي أنا حتى وهعرف اتصرف.. بس لازم أعرف كل حاجة..

- شريف بابتسامة قلة حيلة ورضا بالمكتوب..

شريف

مفيش حاجة تتقال يا سيادة العميد.. اللي اعرفه قولته ف التحقيقات.. واللي مقولتوش يبقى معرفوش..

قطع

صالَة جيم/ بيت رفعت

مكالمة تليفون

- سارة تقلب ف الموبايل، وترى فيديو الحكم بالإعدام على شريف، ويبدو عليها التأثر وتتصل بسلوى..

سارة:

ايوه يا سوسو.. عاملة ايه وحشتيني.. بقولك ايه، هو عمي عامل ايه؟..

- سلوى باند هاش مفرح..

سلوى

عمك؟

متهيألي هو لو سمعك بتقولها وبتتطمني عليه.. هيبقى كويس اوي..

- سارة تتحدث بتأثر..

سارة

ماهو بصراحة لسة شايقة فيديو الحكم بتاع الولد الفنان اللي عمي مهتم بيه ده، وصعب عليا أوي، وأكيد هو متأثر.. مش كدة؟

سلوى

لا يا سارة.. متأثر دي لما يكون حد بعيد ويصعب عليه.. عمك متبهدل.. وكأن الولد ده حد من ولاده.. أدعيه يا سارة الأمور تعدي على خير.. انا خايقة عليه أوي..

- وجه سارة يعبر عن الحزن والحيرة..

قطع

فوتومونتاج

عرض لقطات عديدة لفترة زمنية (عام)

سيكتب على الشاشة (بعد مرور عام)

تعرض اللقطات مع خلفية لمونولوج إسماعيل يس (هي ايه
معنى السعادة)، أو ما يتراءى لمخرج العمل..

اللقطات عبارة عن:

- رفعت وشريف يلعبان الشطرنج - يفطران سويا - شريف يرسم - يشاهدان فيلم (غزل البنات) في غرفة الفيديو بروجيكتور بالسجن - رفعت مع المحامي - نادية ترتدي الأسود وتبكي في المدافن هي وعماد وعدد من الناس ويقرأون الفاتحة (تعبير عن وفاة الأم) - عماد مكتئب ف بيته - شريف يعطي رفعت حقنة ف الوريد - جلسات المحاكمة والمحامي يترافع - رفعت يؤم شريف والضباط في الصلاة - حفلات سمر ف السجن - سارة تدخل على رفعت وهو جالس حزين ف بلكونة بيته وتطبطب عليه وهو يحتضنها - رفعت وشريف يلعبان الشطرنج - تنتهي اللقطات بالعديد من لوحات وابداعات شريف..

قطع

مكتب رفعت في السجن / مكتب الضابط ناجي ف المباحث

(مكالمة تليفون)

- تليفون وتبادل لقطات بين رفعت وناجي..

رفعت بصرخة خبر مفرح..

رفعت

انت متأكد؟..

يا ناجي لو الموضوع ده صح، انت تبقى خدمتني خدمة
عمرك.. يعني عرفتوا مكانه بالتحديد ولا المنطقة؟..

ناجي

احنا جالنا إخبارية بأوصافه، وقدرنا نحدد المنطقة واتأكدنا
كمان من هويته..

رفعت بفرح شديد..

رفعت

الله عليك.. وده مستخبي فين؟.. أسوان!.. يابن الكاالب..

ناجي

المشكلة دلوقتي ف القبض عليه، انت عارف مفيش اذن نيابة
ولا ضبط واحضار..

رفعت

متشغلش بالك.. أنا هتصرف.. انا ممكن أعمل أي حاجة يا
ناجي، لو زنقت هطلب مقابلة رئيس القطاع، أو النائب العام
أو الوزير.. انشالله رئيس الجمهورية.. المهم نلحق نجيب
الواد ده قبل ما يهرب.. لأن زي مانت عارف مفيش وقت ..
الحكم بقا نهائي..

ناجي

لأ استنى.. محاول اتصرف، هو كدة كدة كان مطلوب للشهادة،
وامتنع.. يعني فيه شبهة.. اذا فشلت هقولك.. سيبني أسبوع
بالكتير والواد هيكون تحت أيديك.. ومتقلقش الواد تحت
المراقبة.. نجيبه بس ونشوف انت ناوي على ايه..

- رفعت يغلق التليفون وهو سعيد ومنتشي بالخبر ، ثم يمسه ليجري اتصالا آخر..

رفعت

عماد.. قابلني كمان ساعة ونص انت ونادية عند يحيى
المحامي.. هقولك لما اشوفك.. أوعى تتأخر..

قطع

منزل رفعت/ سيارة رفعت

(مكالمة تليفون)

- لقطات متبادلة لتليفون بين رفعت وسلوى..

- سلوى بفرح..

سلوى

انت بتتكلم جد؟..

- رفعت بسعادة وفرح بالغ..

رفعت

وبعدين بقا.. شكلي هغير رأيي

سلوى

لا تغير أياه.. داحنا هرمنا من أجل هذه اللحظة.. دانا نسيت
شكل الشاليه يا راجل.. طب قوللي هنقعد قد أياه..

رفعت

بصي.. معاكي 5 أيام بحالهم.. بس لو فيه مستجدات ممكن
نرجع ف أي لحظة.. انا بعث الأجازة لزين وأشرلي عليها...

سلوى

حلوين.. واحنا طايلين.. طب هشوف ظروف سارة.. انشالله
تقضي معانا يومين ثلاثة..

رفعت

يا ريت..

سلوى

طب انت فين دلوقتي؟

رفعت

راجع من عند يحيى المحامي وطالع ع السجن عشان أظبط
الدنيا هناك قبل الأجازة.. المهم معاكي بكرة كله تجهزي
نفسك.. ونتحرك بعد بكرة الصبح باذن الله..

سلوى

الله عليك.. طب مش هتقولي أيه الأخبار السعيدة اللي تخلي
سيادة العميد الفنان يتنازل عن وقاره ويروح يصيف..

رفعت

يا ستي خلي حاجة نرغي فيها ف المصيف بتاعك ده..
محكيك كل حاجة هناك..

قطع

مدخل السجن

- رفعت يترجل نحو المبنى الإداري.. توجد سيارة ترحيلات ينزل منها سجناء يرتدون أبيض، ويقفوا طابور أثناء مرور رفعت..

- رفعت يقترب من الصول المعني باستلام السجناء..

رفعت

جايين ف ايه دول يا درش؟

الصول

ف تيك توك يا باشا

رفعت

أيه.. طب ماجوش ف عربية الترحيلات ليه..

- الصول يشاور ع العربية..

رفعت

أه.. تيك توك.. وهو البتاع ده بيسجن رجالة برضو؟..

- ينظر إليهم باستغراب ويضحك..

رفعت

غريبة دي.. رجالة كمان.. العيال شكلها مش تمام..

قطع

مكتب رفعت في السجن

- رفعت ف مكتبه، منتشي وسعيد.. الطاولة التي أمام مكتبه عليها أطباق طعام (كباب وكفتة وسلطات وعيش) وع المكتب عدة أكياس..
- ف الخلفية صوت فيروز، ويستمر معنا لنهاية المشهد ويبدأ بأغنية (زوروني كل سنة مرة)..
- الأجواء ليلية ومبهجة..
- يدخل شريف المكتب ويندهش من شكل الاحتفالية..

رفعت

تعالى يا بطل

شريف

ايه ده يا باشا. احنا عندنا مناسبة ولا ايه؟

رفعت

عندنا.. تعالى نحتفل الأول وهبقى أفهمك

- رفعت يفرغ باقي الأكياس وهو يتحدث..

شريف

اصلي بصراحة اتعودت من سيادتك ع العشا الخفيف.. جبة..
زبادي.. فول.. لكن الوليمة دي معناها ان فيه أخبار سعيدة..

- رفعت بفرح..

رفعت

طب ما تخمن كده.. بس وانت بتاكل

- يمد رفعت يده برغيف عيش الى شريف..

- شريف يبدأ ف الأكل، وبعده رفعت وهو يتأمله بنظرة حب وفرح..

شريف

مش عارف.. بس .. ايه.. سارة هتتجوز؟

- يضحك رفعت ضحكة خفيفة

رفعت

وهي لو سارة هتتجوز هاجي احتفل معاك انت ليه؟..

شريف

أه.. صحيح.. أمال؟.. خير؟

شريف

خير.. كل بس وهفهمك كل حاجة

مزج

مكتب رفعت في السجن

- نفس أجواء المشهد السابق، مع فراغ بعض الأطباق.. انتهوا من العشاء.. أكياس وأطباق كثير مليئة بالطعام..

- استمرار لصوت فيروز ف الخلفية..

- رفعت ينادي على عسكري الحراسة..

رفعت

رمضان

- يدخل العسكري رمضان

رفعت:

لم الأكل ده وخذ اتعشى انت ومسعود وريان ورجب.. وشوف
اللي عاوز ياكل..

رمضان

ربنا يخليك يا باشا

- يدخل رمضان ويلم الأكل

- رفعت وكأنه يعاتب شريف..

رفعت

انت ليه مش محسستي انك فرحان يا جدع.. اهو أي قشاية
بننشلق فيها..

- شريف مبتسمًا..

شريف

انا فرحان بالعشوة دي اكثر بصراحة..

- رفعت بهزار أبوي..

رفعت

تصدق انك فقري

شريف

انا راضي بقضاء ربنا

رفعت

ونعم بالله.. طب تعالى نهضم بقااا يا عم الفنان..

قطع

سيارة عماد

- عماد ف السيارة وهي واقفة.. في مكان غامض ومظلم.. يتحدث ف الموبايل.. موبايل أزارار صغير..

عماد منفعل ومتوتر جدًا..

عماد

بقولك يا بني آدم.. انا وانت هنتكشف.....

انت عارف العميد رفعت لو عرف ممكن يعمل فينا أيه؟..
اهرب بسرعة م المكان اللي انت فيه .. هم خلاص وصلوك..
انتكر ولا اتزفت بأي طريقة.. المهم تهرب.. مفيش وقت.. انا
هنا قصاد عينهم ولو عرف أو شم خبر بس هيخلص عليا...

مزج

حجرة يوسف

حجرة صغيرة (مخبأ)

- يوسف جالس ع السرير ينهي مكالمته مع عماد..

- يبدو عليه التوتر والخوف، ويتحدث منفعلًا..

يوسف

طب والعميد ده أيه اللي دخله أصلاً.. هي ناقصة..

طيب يا عماد.. اقفل.. هشوف هعمل أيه وهبلغك أول ما

أوصل لمكان جديد.. ده اذا عرفت اتنيل أهرب..

- يمسك رأسه بتعب وخوف..

قطع

حجرة الفيديو بروجيكتور في السجن

- قاعة صغيرة بها شاشة بروجيكتور ومقاعد.. أشبه بقاعات السينما الصغيرة..
- رفعت وشريف يجلسان ف كراسي القاعة، ويشربان الشاي بلبن، وشاشة البروجيكتور عليها داتا شو أو بريسنتيشن للوحات عالمية، الشو يعرض بدون صوت، أو صوت خافت، وهما يتحدثان..
- صوت فيروز مستمر ف الخلفية..

رفعت

أهو العشا ده بقا، عاوزك تقعد عليه أسبوع

شريف

اشمعى؟

رفعت

عشان قررت أسمع كلامك يا سيدي واخد أم العيال ونطلع الساحل.. أينعم مفيش عيال، بس أهو تغيير .. دانت لو تشوفها لما قولتلها كان ناقص تزغرد..

شريف

هايل.. ده خبر حلو أوي

- رفعت يتحدث بتمنى..

رفعت

وكلها كام أسبوع وتخرج بالسلامة واشهيك زي ما بيقلو

شريف

كام أسبوع وأخرج !!!.. انت طيب أوي يا ريس.. طب وهتشهيكني ازاي بقا.. لو خرجت يعني..

- رفعت بهزار أبوي.

رفعت:

أبو فرك يا أخي.. هشهيك ازاي؟..

- رفعت يفكر...

ماهو انت مش بتاع ساحل والحركات دي.. انت بقا صاحبي
الفنان.. يعني خد عندك بقا.. معارض على أفلام على ندوات
على مزادات على مسارح على حفلات.. بص.. هوريك اللي
عمرك ما شوفته..

شريف

وهو فيه احسن من كده.. ايدي على كتفك

رفعت

بص بقا ركز ف الفيلم ده..

- رفعت يوقف البروجيكتور بالريموت على لوحة للفنان إل جريكو

رفعت

بص شغل الراجل ده..

- يعرض بعض اللوحات..

رفعت

أهو ده رسام اسباني .. اسمه ال جريكو.. الراجل ده قلب
الدنيا بشغله، عشان ابتكر أسلوب جديد ف الرسم، اللي هو
فكرته قايمة ع الاستطالة اللي هتلاقيها ظاهرة ف كل لوحاته..
بص..

- تعرض اللوحات ويتضح فيه أسلوب الاستطالة..

رفعت

أهو الأسلوب الجديد ده اللي اعتبروه نهضة فنية وتطوير
ساعتها.. بس بعد ما الراجل مات.. كشفوا على عينه.. طلع
يا عيني كان عنده استجماتيزم بس شديد بيخليه يشوف
الاجسام بالشكل المطيول ده.. يعني لا هو أسلوب ولا
يحزنون..

- بيتسم شريف للحدوتة..

- يقلب رفعت الريموت كنترول الى أن تظهر صورة دافنشي...

رفعت

ده بقى عم الكوكب..

شريف

دافنشي..

رفعت

انت عارف ان الراجل ده كان واحد من أهم علماء عصره..
تخيل.. علماء مش فنانين.. وكان معروف بانجازاته العلمية
واختراعاته.. غير أنه اديب ومهندس معماري ومهندس
حربي وعالم فلك ورياضيات وفيزياء وجيولوجيا وخرايط
ونباتات.. كل ده بقا غير الرسم والنحت...

تخيل كل ده ويقال انه كان عنده أوتيزم.. توحد..

- شريف يسمع ولا يرد وكأنه غير مبالي..

- تظهر ع الشاشة لوحات دافنشي الى أن تستقر على لوحة العشاء الأخير..

رفعت

اعظم عظمت اللوح

شريف

طب انت تعرف حكاية اللوحة دي كويس؟

رفعت

إلا اعرف.. تحب اسمعك؟

خد عندك.. مقاسها حوالي 9 م ف 7 م.. موجودة ف دير
سانت ماريا ف ميلانو....

- شريف مقاطعا..

شريف

مش قصدي على معلومات اللوحة.. قصدي على حكايتها..

رفعت

احكيلنا انت يا زرع النوى

مزج

حجرة الفيديو بروجيكتور / مرسوم ليوناردو دافنشي / شوارع في مناطق نائية في القرون الوسطى في فلورنسا / حجرة العشاء بدير سانت ماريا

(فوتومونتاج)

- يبدأ شريف في سرد حكاية لوحة العشاء الأخير، بأجواء أسطورية حاملة مع خلفية موسيقية تتماشى مع الأجواء الأسطورية الفنية لحكاية رسم دافنشي للوحة في القرون الوسطى.. يتم الانتقال مع الحكاية الى مشاهد لـ دافنشي وهو يختار الأشخاص ويرسمهم حسب حكي شريف، وتسلسل الحكي، الذي يكون أشبه بالتعليق السردي للمشهد المعروض، ويمكن استمرار تداخل صوت فيروز (ترانيم) تتناسب مع أجواء المشهد ف الخلفية ...

- شريف يحكي بأريحية وكأن القصة تخصه..

- رفعت مستمتع جدًا بحكي شريف..

شريف

زي ما حضرتك عارف طبعا.. دافنشي كان عبقرى.. عشان كده لما اتطلب منه يعمل لوحة العشاء الأخير، قرر أنه لازم يكون مختلف، عشان اللوحة دي اتعملت كتير قبل كده من فنانين تانيين، فقرر ان يعمل فيها كل حاجة مختلفة، من أول الخامات المستخدمة لحد الرمزيات اللي مالية اللوحة ووضعية الشخصيات والبناء الهندسي والمنظور والعمق ولحظة المشهد.. كل ده كان جديد.. بس عمل حاجة أهم من كل ده...

- يبدأ شريف يحكي التفاصيل، ويظهر دافنشي في لقطات فلاشية وهو يختار أشخاص لرسمهم.. يبدأ من السيد المسيح ثم بطرس ثم توما.. ثم الباقي.. كل شخص يرسمه بوضعية اللوحة المعروفة واحد تلو الآخر.. اللقطات تتماشى مع حكي شريف.. تنتقل من الطرقات في الاختيار.. الى رسم الاسكتشات الأولية داخل مرسومه.. سيتم الاستعانة بصور الاسكتشات الأصلية لدافنشي للوحة العشاء الأخير...

شريف

يقال انه لما جه يرسم، قرر أنه هيجيب ناس حقيقيين يرسمهم، بشرط يكون كل واحد هيجيبه فيه شبه ف الصفات من الشخصية اللي هترسم.. يعني مثلا لما جه يرسم السيد المسيح، فضل يدور على انسان شكله كويس ومعروف عنه الوداعة وف نفس عمره، ولما جه يرسم بطرس، جاب واحد ف نفس عمر بطرس وفيه صفات الاندفاع والقوة اللي

معروفين عنه، وتوما.. دور على واحد معروف انه شكاك..
وهكذا لحد ما وصل لنهاية اللوحة...

- يستكمل الى يهوذا الذي يستعرض اختياره ورسمه اسكتش ثم رسم اللوحة ع الحائط بالحجم الكبير.. مع ضرورة أن يكون المرسوم على أنه يهوذا هو نفسه المرسوم على أنه المسيح.. مع التركيز على التغيير الذي تم على ملامحه..

- (يمكن عمل تداخل أو مزج بين وجه شريف ووجه الشخص الذي يرسم كالمسيح، ومرة أخرى بين وجه شريف ووجه يهوذا) أو حسب ما يتراءى للمخرج.

- كل هذا مع حكي شريف لدافنشي الى أن يظهر التكوين الكامل لصورة اللوحة المعروفة

شريف:

كان لازم يرسم يهوذا عن طريق رسم واحد فيه صفاته، فراح للمناطق النائية والمعروف ان فيها مغارات اللصوص والحرامية وقطاع الطرق والضالين.. وفضل يدور فيهم لحد ما جاب واحد شكله مناسب.. ملامحه قبيحة.. وفيه صفات الطمع والخيانة وقام رسمه على انه يهوذا..

- يظهر الاهتمام والانتباه على وجه العميد رفعت..

بعد ما خلص جاله الراجل ده وقال له.. انت مش فاكرني؟..
قاله لأ انا معرفكش..

قاله انت رسمتني قبل كده.. دافنشي قاله ازاى أنا اول مرة
ارسمك، دي حاجة متنسيتش.. فالراجل رد عليه وقاله، أنا
اول واحد انت رسمتني ف اللوحة..

ماهي اللوحة خد في رسمها اكثر من 3 سنين...

يعني اللي رسمه على انه يهوذا.. كان قبل كده المسيح..
بس اتغير، وزى ما اتغير من جوة، شكله كمان اتغير من برة

رفعت

أو ممكن تقول ان اللي كان رسمه على أنه المسيح البري..
طلع يهوذا الخاين.. بس كان عارف يداري اللي جواه، أطول
وقت ممكن، لحد ما ظهر على حقيقته

قطع

شوارع أسوان

مطاردة شرسة بين سيارات الشرطة، وبين يوسف الذي يستقل (فيسبا) في شوارع أسوان مع التركيز على سهولة وحرية مراوغة الفيسبا عن السيارة، الى أن يستطع يوسف الهروب...

قطع

- رفعت وسلوى يجلسان على شيزلونجات ع الشاطئ، يرتديان ملابس البحر.. ويبدو عليهما السعادة..

انا مش مصدقة نفسى...

- یضحکان

وهو يا زرع النوى، عامة الشعب يقدرُوا ييجوا هنا يا
حسرة..

بقولك ايه متفكرينيش لحسن انا دمي محروق..

مش كنا وفرنا وروحنا حضرنا العرض الأول لفيلم عنتر
ولبلب.. النسخة الأصلية لما كان اسمه شمشون ودليلة، ف
قصر ثقافة الأنفوشي، واسمها برضو اسكندرية ومصيف
ونتعشى سمك وجمبري..

- رفعت يضحك، وسلوى كأنها تستغيث..

ياختااااااي

قطع

مكتب العقيد ابراهيم في السجن

- ابراهيم على مكتبه، ومعه تليفون...

ابراهيم

يا باشا سيادتك متقلقش ومتشغلش بالك والنبى.. كله ماشي
تمام وكأن سيادتك موجود بالظبط، وانا بتابع مع اللواء زين..
ركز سيادتك ف اجازتك وترجع بالسلامة.. هو صحيح سيادتك
ف انهى ساحل؟.. الشرير ولا الطيب؟....

مفيش يا فندم.. طب الحمد لله يا فندم.. كنت عاوز اتطمئن على
سيادتك بس..

- ابراهيم يضحك..

مع الف سلامة يا فندم..

- يدخل ضابط 1 ومعه إشارة (ورقة) ..

ضابط 1

تمام يا فندم، الإشارة دي لسة واصله من القطاع

- يأخذها ابراهيم وينظر فيها، ويظهر على وجهه صدمة شديدة..

ابراهيم

يانهار اسود

- يقوم ابراهيم مسرعا من مكتبه..

قطع

الشارع / سطوح منزل قديم

(مكالمة تليفون)

- لقطات متبادلة لمكالمة تليفون بين عماد ويوسف..
- عماد يمشي ف الشارع، ويوسف واقف على سطح بيت..
- كل منهما يحمل تليفون قديم بأزرار..
- عماد بأداء عنيف جدًا...

عماد

ايشحال ان انا محذرك يا يوسف، أعمل ايه تاني يعني..

- يوسف خائف ومضطرب وغضبان...

يوسف

محذرنى ايه وزفت ايه.. انا كنت هموت اكثر من مرة.. انا
بجد تعبت، ومش عارف هتخلص على ايه...

عماد

انا اللي تعبت وانا اللي ف خطر اكبر.. يا ريتني ما سمعت
كلامك يا أخي ولا سيبتك تمشي بدماعك...

قطع

غرفة نوم شاليه الساحل

- رفعت نائم ويرن جرس الموبايل

- يستيقظ رفعت وينظر ف الموبايل ويرد بهمس

رفعت

ها يا ناجي.. فيه جديد.. استنى طيب خليك معايا..

- ثم يخرج من الحجرة مسرعاً...

قطع

حجرة معيشة شاليه الساحل

رفعت

معاك..

- رفعت بصوت عالي جدا وانفعال غير عادي..

رفعت

يعني أيه هرب منكم، انت بتهذر.. عيل زي ده يهرب م
الداخلية يا ناجي...

- تخرج سلوى على زعيقه..

- رفعت منفعل جدا..

رفعت

حد مبلغه يعني ايه.. هيكون انا ولا المحامي ولا حد من عند
سعادتك.. اقفل يا ناجي..

- رفعت يلقي التليفون بغضب حاد..

قطع

سيارة رفعت.. طريق الساحل/القاهرة

- يقود رفعت مسرعا ويبدو عليه الحزن والضيق الشديد، ومعه تليفون..

رفعت

ايوة يا إبراهيم، انا نازل خلاص.. كلها ساعتين واوصل
البيت.. حاجة ايه ما تقول... اخلص يا إبراهيم انا روجي ف
مناخيري.. مش هستنى للصبح انا.. فيه أيه؟..

- رفعت يسمع الخبر ويصطدم ويفرمل فجأة على جانب الطريق وينظر للأمام، وهو مسهم
وغير مدرك.. يترك التليفون وتأخذه منه سلوى وتسأله وهي مخضوضة..

سلوى

فيه ايه يا رفعت؟

- رفعت واضعاً رأسه ع الطارة، ولا ينطق..

سلوى

قوللي في ايه.. إبراهيم قالك أيه؟

- رفعت يحاول أن يتماسك، ويتحدث بأسى..

رفعت

القطاع قرر تنفيذ الحكم ف شريف يوم الحد.. بعد بكرة..

سلوى

- سلوى تتخض وتضع يدها على فمها..

يانهار أسود

قطع

زنزانة شريف

فوتومونتاج

- شريف نايم في زنزانته وتظهر لقطات عشوائية وكأنها صور كحلم أو كابوس يؤرقه..
 - لقطات لطفل في مدرسة.. صورة والده المتوفي.. لقطة سريعة لأمه وهي تذهب به للمدرسة..
 اخته نادية وهي تحتفل معه بنجاحه.. لقطة لشابة ترقص ف ملهى.. لحظات القبض عليه..
 لقطات ليوسف وعماد.. لوحات مرسومة للراقصة.. عدة لقطات له مع رفعت مع اللوحات
 والمنحوتات التي رسمها.. انتهاء بلقطة مرتعشة وتظهر كوميز للوحة العشاء الأخير وبعض
 اللوحات العالمية...

مزج

فناء السجن

- صوت مفاجيء لسارينة سيارة الإسعاف يقطع المشهد السابق..
- تظهر السيارة وهي تخرج من بوابة السجن بسرعة مع التفاف العساكر والضباط..

قطع

مكتب رفعت في البيت

- رفعت جالس حزين ومكتئب ومنكوش ويبدو عليه عدم النوم والراحة..
- تدخل سلوى تحمل فنجان قهوة وتضعه أمام رفعت وتطبطب عليه، وتحدثه بحزن وتمني..

سلوى

يعني هو كد مفيش أي محاولة للتأجيل، مش يمكن يلاقوا
يوسف النهاردة...

- رفعت يرد وهو شبه منهار وتخرج منه الكلمات بصعوبة..

رفعت

مفيش حاجة ممكن تلغي أمر تنفيذ غير قرار من النيابة العامة
أو الوزير، وده ف حالة التأكد من دليل أو اشتباه ف معلومة
تغير مجرى القضية، وده وقته خلاص عدى.. مفيش حاجة
ممكن تحصل...

سلوى

طب انت ناوي تعمل ايه بكرة؟

رفعت

مش هروح طبعا

سلوى

مش عارفة أقولك أيه.. ومش عاوزة أضغط عليك أو أحيرك
بين مشاعرك واحساسك النبيل ده، وبين واجبك اللي عمرك
ما قصرت فيه..

رفعت

سيبيني يا سلوى دلوقتي

الموبايل يرن ويرد رفعت بتعب وهمدان...

رفعت

فيه ايه يا إبراهيم.. أيه

- صدمة هائلة على وجه رفعت..

قطع

مكتب رفعت في السجن

- رفعت يبدو عليه الإعياء والتعب الشديد، يجلس ف مكتبه، وجهه أصفر.. ملابس غير مهذمة.. الكرافة مفكوكة.. يقف أمامه إبراهيم..

رفعت

أيه اللي حصله بالظبط؟

إبراهيم

كان قاعد ف مكتبه عادي وقبلها دخلته التمام، وكان كويس.. فجأة سمعنا صوته بينادي دخلنا عليه لاقيناه ماسك قلبه، جرينا بيه ع المستشفى قالوا جلطة ف القلب..

بعدها رئيس القطاع اتصل بيا لما تليفون سعادتك كان مقفول عشان ابغك باستلامك مأمورية السجن مكان اللواء زين لحد ما يرجع بالسلامة...

رفعت

طيب

- إبراهيم مترددًا ومرتبكًا..

إبراهيم

معلش يا فندم.. مندوب الأوقاف.. وقيادات القطاع والنيابة هيكونوا موجودين كمان ساعة بالكثير.. وسيادتك لسة مأشترتش على قرار التنفيذ واستلام وفتح حبل التنفيذ....

- رفعت يتماسك بصعوبة ويشاور لابراهيم بالموافقة.. إبراهيم يشاور للوصول بالدخول ..
- الوصول يحمل بيده علبة حبل المشنقة مغلقة ومختومة، ويضع إبراهيم أوراق التأشيرة أمام رفعت ويوقعها رفعت بصعوبة ويد مرتعشة دون النظر فيها..
- يخرج رفعت ورقة مطبقة من جيبه ويفردها ليظهر عليها (استقالة).. ثم يضعها وسط الأوراق التي وقعها دون أن يراه أحد..
- ثم يمسك إبراهيم العلبة المغلقة.. والتي يظهر بها حبل المشنقة فور فتحها.. يمسكها رفعت ويده مرتعشة وهو يحاول إخفاء ذلك.. ثم يوقع على استلامها..
- يشاور ابراهيم للباب ليدخل عشاوي ويستلم المشنقة ويوقع.. رفعت ينقبض فور رؤيته لعشاوي..

قطع

زنزانة شريف

- العساكر تأخذ شريف من محبسه ويخرج معهم بهدوء و غير مبالي..
- تقترب الصورة لحوائط الزنزانة بعد خروج شريف ليظهر بعدها رسومات عدة وشخبطة كروكي بالطباشير لملائكة وشياطين وراقصة وأمه وحبل مشنقة و.. ولوحة العشاء الأخير...

قطع

مبنى سجن

- لقطات بانورامية من أعلى تستعرض مبنى السجن ثم الأسوار المرتفعة، بنفس الشكل الذي ظهر ف المشهد الأول..
- ثم داخل السجن من أعلى الأسوار لعرض فناء السجن من الداخل..
- ويظهر صوت العميد/ رفعت، وهو يقرأ حكم الإعدام على شريف، بينما الصوت يكون مرتعشا ويبدو عليه محاولته للتماسك، ويستجمع قواه لمحاولة الاستمرار ف قراءة بيان تنفيذ الحكم...
- لقطات (انسيرتات) على يد رفعت المرتعشة وهي تحمل الورقة التي يقرأ منها..
- على حبل المشنقة.. على أرجل الواقفين.. على العرق الذي يتصبب من وجه رفعت.. على عيون شريف التي تصرخ بالبراءة كالأطفال....
- كل هذا مع صوت العميد رفعت...

ص. رفعت:

حكمت محكمة جنايات القاهرة حضورياً.. بإجماع الأراء.. في القضية رقم 987 لسنة 2022، بمعاينة المتهم شريف عبدالله حسن البنهاوي بالإعدام شنقاً، حيث أنه بتاريخ 14 أكتوبر 2022 قام بقتل المجني عليها رقية سيد الأخرس، بأن عقد العزم على التخلص منها، عمداً، باستخدام سلاح أبيض (سكينه) كان قد أعده مسبقاً لهذا الغرض، ...

- يخفت الصوت تدريجياً، مع ظهور ومضات وفلاشات سريعة لمشهد الجريمة.. وينتهي بصوت عصا المشنقة المعروف بقوة، مع عدم ظهور مشهد التنفيذ، أو كما يتراءى للمخرج..

قطع

مكتب رفعت في البيت

- يستعرض المشهد ركن اللوحات والمنحوتات والتماثيل التي أبدعها شريف، ويظهر أن رفعت قد خصص لها ركن أو حائط في مكتبه وكأنه متحف لأعمال شريف.. كل هذا مع صوت عبد الوهاب في الخلفية لأغنية (من غير ليه)...

مزج

مكتب رفعت في البيت

- رفعت يجلس على كنية ف مكتبه بالمنزل، أمامه كوب شاي بلبن.. يرتدي جلباب .. وذقنة طويلة .. شعره منكوش ووجهه ف اعياء واكتئاب وحزن..
- يظهر خلفه الحائط الذي يحمل اللوحات والمنحوتات التي أبدعها شريف..ف المنتصف الصورة التي تجمعهم..
- صوت أغنية عبد الوهاب معنا من المشهد السابق..

يكتب ع الشاشة:

(بعد مرور أسبوعين)

- تدخلان سلوى وسارة يرتدن أسود.. سارة تجلس على يد الكنية بجواره وتضع يدها على كتفه وتطبطب عليه..
- سلوى تقترب منه بهدوء وتحدثه بهمس..

سلوى

فيه ناس عايزينك يا رفعت

- رفعت يهز رأسه بالنفي والضيق الى أن ينظر على باب المكتب ليجد.. نادية و عماد ويوسف.. نادية ترتدي الأسود..
- ينفع رفعت بمجرد رؤية يوسف ويجري عليه متحاملا كأسد جريح يزأر للفتك به..
- يمسكوه عماد وسارة وسلوى ونادية ويقوموا بتجليسه..
- سلوى تعطيه كوب ماء.. يشرب ويأخذ نفسه بصعوبة.. ثم ينظر إليهم باندعاش شديد غير مدرك لما يراه.. تقترب منه نادية وتجلس أمامه..

نادية

أنا هحكي لحضرتك كل حاجة .. بس من فضلك اهدى واسمعي

- رفعت يصمت ولازال مندهشا..
- نادية تبدأ ف الحكي، مع استعراض للقطات فلاشية أو ومضات لمشاهد الجريمة

نادية

يوسف خطيبي.. طلب ايدي من شريف قبل الجريمة بحوالي
ثلاث أسابيع، وشريف كان مبسوط أوي، وكنا بنحدد معاد
ومكان الخطوبة لولا اللي حصل..

- رفعت ينطق بصعوبة.. بصوت تملأه الخنقة..

رفعت

وعشان كدة بلغتيه اننا وصلنا لمكانه عشان يهرب.. بعني
أخوكي عشان عيل زي ده..

- يشير الى يوسف باستحقار..

- نادية باكية..

نادية

تفتكر حضرتك ده ممكن يحصل.. خليني أكمل وحضرتك
هتفهم كل حاجة...

يوسف جارنا من زمان، وهو خريج صيدلة برضو.. بس كان
سابق شريف وعماد بكذا سنة.. وكان مهتم بشريف ويحاول
يساعده طول الوقت لما لقاه غلبان كدة.. شريف مكانش ليه
أصحاب غير يوسف، وعماد اللي اتعرف عليه ف الكلية..
وأغلب الوقت كلنوا بيبقوا مع بعض..

- رفعت ينظر لعماد..

رفعت

الله هو انتوا كلكم كدابين بقا.. انت مش قولتلي انكوا زميل
من وانتوا صغيرين ف المدرسة..

عماد

اضطريت أقول كدة عشان أكذلك اني مهتم بيه وانه زي
أخويا..

نادية:

لاحظنا ان شريف كان مختلف من وهو صغير.. بابا وماما
على قد حالهم.. مدوش الموضوع اهتمام غير أنه طفل
منطوي شوية.. مبينفعلش.. ولما دخل المدرسة لقوه شاطر
جدا ومتفوق.. اتطمنا.. لكن انا كنت شايفة انه مش عادي..
ولما كبرت وقريت.. عرفت أن عنده طيف التوحد.. بس
بنسبة صغيرة.. لأنه بيتفاعل مع الناس وليه أصدقاء ومتفوق
وبيشغل وموهوب.. الحاجة الوحيدة اللي كانت واضحة انه
لما بيكتتب بيسكت.. وتقصر او تطول المدة حسب كمية
الزعل..

- رفعت يندهش..

رفعت:

ايه اللي بتقوليه ده.. انا ملاحظتش فيه أي حاجة عقلية..

نادية

هو معندوش مرض عقلي.. بالعكس عقله أذكى مننا كلنا..
لكن حالته بتظهر ف علاقاته مع الناس.. ف انفعالاته..
هتلاقية عمره ما يضحك من قلبه، أو يعيط.. غير أنه لما
يغضب اوي ببسكت.. وممكن سكوته ده يستمر شهور.. وهو
ده طيف التوحد واللي بيختلف من فرد للتاني حسب نسبته..

رفعت

وازاى متبلغونيش أو ترفقوا حالته دي ف القضية؟.. أكيد
كانت هدفه وتغير الحكم.. ده لو افترضنا أن كلامكم صح...

عماد

لأن نسبة التوحد اللي عنده ضعيفة اوي، ومتعفيهوش م
المسألة والمحاكمة..

نادية

كنا واثقين أنه بريء.. عشان كدة خوفت أقول أنه بيعاني من
متلازمة اسبرجر.. كأننا بنقول أنه هو القاتل بس مكانش ف
وعيه.. ودي حاجة كنا مستبعدنها تماما.. غير أنني لما سألت
أساتذة قانون وبلغت أ رضا المحامي اللي قبل المستشار.
يحيى.. عرفنا أن المرض ده 3 مستويات.. هو في المستوى
اللي التوحد فيه ينحصر ع العزلة والانطواء ولا يعفى من
المسئولية الجنائية، وفيه قضايا كتير وأحكام تمت ع الأساس
ده في مصر وبرة مصر..

رفعت

وانتوا عاوزين أيه دلوقتي.. جايين تقولولي الكلام ده ليه..
مفيش أي حاجة تدينه..

يوسف

أنا هكي لحضرتك اللي حصل..

مزج

مكتب رفعت في البيت / المرسوم / الملهى الليلي / الجراج / لقطات متفرقة

فوتومونتاج

- يبدأ يوسف في الحكي وتظهر الصورة تفاصيل الحكاية مع صوت يوسف.. مرسوم شريف وهو يرسم لوحات الملهى الليلي والراقصة روقة وهي ترقص وأسلوبها في مشاغله.. مرورًا بالجريمة وطريقة تنفيذها كما يحكي يوسف..

يوسف

قبل الجريمة بأسبوعين فيه ناس شافوا لوحاته وطلبوا منه يعملهم شغل.. ملهى ليلي.. يرسم صور للفنانين والمطربين.. وكان منهم راقصة اسمها (روعة) المجني عليها.. ف الأول عجبها.. فضلت تشاغله وهو ف الأول مش فاهم.. لحد ما زودت عليه العيار وابتدت مشاعره تتحرك.. بقت تلعب بيه وخصوصا لما حسست انه مختلف وبقت تستغله في رسم لوحات لها.. جه حكالي وحذرتي، لكن تأثيرها عليه كان زي المخدر.. لا سامع ولا حاسس بحاجة غيرها... حبها وهو عمره ما كان ليه علاقات أو حس بمشاعر زي دي قبل كدة بسبب ظروفه وانطوانه..

لحد ما لقيته راجع مصدوم ومبيتكلمش.. فهمت ان فيه حاجة.. حاولت أفهم منه على قد ما قدرت.. فهمت انه شافها مع واحد تاني.. هو كان متخيل أنها بتحبه زي ما هي فهمته وهي بتلعب بيه..

قلقت عليه من رد فعله.. وقررت اني أمشي وراه عشان أحاول انقذه منها.. روحت وراه.. ووقفت بعيد.. وكنت عاوز اشوف هي بتعمل معاه ايه ومشدود لها كده ليه.. راقبتهم.. لحد ما لقيتها نزلت الجراج وهو نزل وراها.. كان واقف جنبها وبيكلمها.. فجأة لقيتها بتهينه وبتشتمه وضربته على وشه.. لقيته ف لحظة طلع سكينه من الجاكت بتاعه وغرزها ف قلبها.. مستغرقش ثواني ف رد فعله... وطبعاً صرختها نبهت بتوع الأمن اللي ظهروا في لحظة ومكانش قدامي غير أني أخذه بسرعة وأهرب به... لكن بعد مخرجنا من المكان وأنا مصدوم ومش عارف أفكر نروح على فين... لقيته

بيقولي بهدوء غريب وديني المرسم... حاولت أفهمه أن
المرسم دلوقتي ممكن يكون خطر عليه لكنه أصر وماكنش
قداامي غير أني أسمع كلامه وادعي ربنا أن بتوع الأمن
مايكونوش شافوه أو اتعرفوا عليه لحد ماسمعت بالقبض
عليه...

- رفعت غاضبا ومندهشاً...

رفعت

انتوا بتقولوا أيه.. انتوا بتلبسوها للمسكين اللي راح عشان
تعيشوا حياتكم.. انا ايه اللي يخليني اصدق الكلام ده...

يوسف

لما روحت وراه حسيت انها ممكن تعمل فيه حاجة.. خوفت..
قولت اصورها عشان ابقى اثبتله انها مش بتحبه زي ماهي
مفهامه.. وفضلت بصور لحد الآخر....

يخرج يوسف موبايله من جيبه ويشغل الفيديو ويعطيه لرفعت
ليرى الجريمة مصورة بوضوح بيد شريف، وهو مندهش
وغير مصدق...

- رفعت وكأنه يكلم نفسه...

رفعت

يعني شريف كان بيخدعني كل ده.. بيستغلني عشان اساعده؟
وأول كلمة نطقها يقوللي انه بريء..

- نادية مندفعه...

نادية

لأ.. شريف مخدعكش.. لأنه مبيكدبش.. هو ف الغالب جاله
حالة من الإنكار.. وهنا يبجي دور طيف التوحد الوحيد.. جه
بعد الجريمة مش قبلها.. لان الجريمة والانفعال كان مستواهم
أعلى من احتماله من الضغط النفسي، فأنكر انه عمل كده،
وصدق انه مالوش علاقة بيها، وانه مظلوم وبريء، وف
نفس الوقت مش قادر يفسر ايه اللي حصل، عشان كده مش
عاوز يتكلم ولا يفتكر...

رفعت

طب لو الحكاية كده.. البيه ده كان هربان ليه؟

يوسف

لأنني مطلوب للشهادة، والكاميرات صورت اني دخلت الجراج
بالعربية، ومكنتش عارف اعمل ايه واشهد بأيه.. اشهد كذب
وأقول اني معرفش حاجة ومشفتوش وانا هحلف بجلال الله..
طب ولو عملت كده اضمن منين ان محدش تاني يلبسها
واشيل ذنبه طول عمري.. ولا أشهد بأنه هو القاتل وأنا اللي
اسلمه لحبل المشنقة.. معرفتش أعمل ايه.. وخوفت، وجريت
وهربت...

- بيكي بحرقة والجميع يبكون ولازال رفعت مندهش

قطع

المدافن

الجميع يقفون يقرأون الفاتحة أمام مدفن شريف.. رفعت وسلوى وسارة ونادية وعماد ويوسف..
الجميع سيكون

رفعت يسرح ويتذكر لقطات عدة له مع شريف، الى لقاء العشاء الأخير بينهم، ثم حديث غرفة
البروجيكتور، ثم حكاية لوحة العشاء الأخير الى أن تتردد الجملة الأخيرة..

ص. شريف

ماهي اللوحة خد في رسمها اكثر من 3 سنين...

يعني اللي رسمه على انه يهوذا.. كان قبل كده المسيح..
بس اتغير، وزى ما اتغير من جوة، شكله كمان اتغير من برة

ص. رفعت

أو ممكن تقول ان اللي كان رسمه على أنه المسيح البري..
طلع يهوذا الخاين.. بس كان عارف يداري اللي جواه، أطول
وقت ممكن، لحد ما ظهر على حقيقته

- يقترب رفعت من المدفن ويضع الورود ويظهر صوته الداخلي...

ص. رفعت:

حتى لو كنت خدعتني، بقصد أو بغير قصد.. هتفضل ابني اللي اتمنيته

هتوحشني يا بني

تمت